

柯山集附拾遺

一





柯 山 集

附 拾 遺

(一)

J  
17.8  
1.1949

張 耒 撰

# 柯山集目錄

卷一

賦十四首

卷二

賦十八首

卷三

古樂府歌詞四十首

卷四

古樂府歌詞三十四首

卷五

古樂府歌詞十一首

卷六

五言古詩六十五首

卷七

柯山集 目錄

五言古詩七十一首

卷八

五言古詩七十五首

卷九

五言古詩四十九首

卷十

七言古詩四十七首

卷十一

七言古詩五十六首

卷十二

七言古詩三十七首

卷十三

七言古詩三十三首

卷十四

五言律詩八十一首

卷十五

五言律詩七十一首

卷十六

七言律詩七十七首

卷十七

七言律詩七十五首

卷十八

七言律詩七十五首

卷十九

七言律詩六十四首

七言長律詩四首

卷二十

五言絕句十八首

六言絕句二十一首

七言絕句六十四首

卷二十一

七言絕句九十六首

卷二十二

七言絕句九十九首

卷二十三

七言絕句一百零五首

卷二十四

七言絕句九十九首

卷二十五

七言絕句八十一首

卷二十六

七言絕句一百一十七首

卷二十七

同文唱和詩二十四首

卷二十八

同文唱和詩十四首

卷二十九

同文唱和詩一百零六首

卷三十

同文唱和詩七十七首

卷三十一

表狀十五首

冊文一首

卷三十二

論六首

卷三十三

論四首

卷三十四

論六首

卷三十五

論九首

卷三十六

論十首

卷三十七

論九首

卷三十八

論十四首

卷三十九

議六首

說十七首

卷四十

序十四首

卷四十一

記九首

卷四十二



記十首

卷四十三

傳二首

贊五首

銘二首

偈一首

評二首

卷四十四

題跋十八首

卷四十五

題跋十四首

卷四十六

畫簡十三首

卷四十七

啓十三首

阿山集 目錄

柯山集 目錄

疏二首

卷四十八

祝文二十首

祭文八首

卷四十九

墓誌銘五首

卷五十

墓誌銘八首

# 柯山集

## 提要

臣等謹按柯山集五十卷。宋張耒撰。耒字文潛。楚州淮陰人。登進士第。元祐中。官至起居舍人。紹聖中。謫監黃州酒稅。徽宗召爲太常寺卿。坐元祐黨。復貶房州別駕。黃州安置。得自便。居於陳州。主管崇福宮。卒。事迹具宋史文苑傳。蘇軾嘗稱其文汪洋沖澹。有一唱三歎之音。晚歲詩務平淡。效白居易。樂府效張籍。故瀛奎律髓載楊萬里之言。謂肥仙詩自然。肥仙。南宋人稱耒之詞也。文獻通考作柯山集一百卷。茲集卷數。祇得其半。查慎行注蘇軾詩云。嘗見耒詩二首。而今本無之。考周紫芝太倉稊米集有書譙郡先生文集後曰。余頃得柯山集十卷於大梁羅仲洪家。已而又得張龍閣集三十卷於內相汪彥章家。已而又得張右史集七十卷於浙西漕臺。而先生之製作。於是備矣。今又得譙郡先生集一百卷於四川轉運副使南陽井公之子晦之。然後知先生之詩文爲最多。當有網羅之所未盡者。余將盡取數集。削其重複。一其有無。以歸於所謂一百卷。以爲先生之全書云云。然則耒之文集在南宋已非一本。其多寡亦復相懸。此本卷數。與紫芝所記四本皆不合。又不知何時何人摭拾殘剩所編。宜其闕佚者頗夥。然考胡應麟筆叢有曰。張文潛柯

山集一百卷。余所得卷僅十三。蓋鈔合類書以刻。非其舊也。余嘗於臨安僻巷中見鈔本書一十六帙。閱之。乃文潛集。卷數正同。明且訪之。則夜來鄰火延燒。此書條煨燼矣。余大悵惋。彌月云云。此本雖不及百卷之完備。然較應麟所云十三卷者。則多已不啻數倍。亦足見未著作之大略矣。

# 柯山集卷一

宋張耒撰

## 賦

### 大禮慶成賦

惟宋六世皇帝踐阼之七年。所以和同天人。綏靜中外。垂鴻襲裕。增高累厚。以對于神祇祖考者。固已蒙被充塞。光融翕赫。六合一意。四海一口。無得而言矣。粵以壬申之仲冬。將有事于南郊。乃詔列位。恪職賦事。而有司建言。惟我國家。因時施禮。郊丘之位。天地咸在。牲幣並薦。禮樂合舉。而古者乃以陰陽之至。卽南北之郊。別位殊時。薦獻異數。有司其何從。于是天子惕然深思。祇畏敬慎。曰。茲大事。我其敢專。羣公卿士。典禮之官。竭思和會。以訂不易。于是議者曰。先王齋明以享帝。而帝之享否。雖聖人未由知之。惟受福者。其享之占。恭惟國家合祭天地。于茲六世矣。惟我太祖躬膺駿命。以遏亂略。堂皇二儀。拓落八極。以定萬世之業。太宗威定宇內。震蕩大漠。以一九有。定天下于一尊。眞宗熙洽富盛。符瑞委積。南牧之旅。不戰請命。威加北荒。奏功岱宗。仁宗席安據厚。不動指顧。尊獫狁羌。含毒內向。吏士未頓。藏竄屈伏。終始太平。垂五十年。英宗入纂。百姓與能。神考有爲。六服承德。此可謂受天地之福矣。然則神祇之安吾享也。其久

哉。于是天子乃翳青雲之屋。乘雕玉之輿。應龍受轡。招搖翼輔。建虹電之修竿兮。颺彗星之飛旂。太乙執節以先驅兮。二十八星拱手布武。經營而周游。貔貅六師。雷霆萬乘。初海沸而雲涌。忽山峙而川靜。蓋天子倅然玉溫。健然天運。望宮門而動色。顧執策而命進。惟烜赫之靈源兮。實鼻祖于神明。覽光德而來降兮。館玉宇之嚴清。張咸英之廣樂。備千籥之盛舞。景光交徹。鸞鶴來下。神嬉靈豫。醉爵飽俎。翼翼清廟。觀德之宮。七聖在天。時降于宗。世有哲孫。豈弟無疆。惠我文人。案此下脫四字。瞻祖祏而念功兮。顧禰室而感親。聖孝油然而發中兮。在位望而含辛。霽暘告旦。祥飈掠塵。從我髦士。來祗精禋。御史肅吏。司馬飭兵。既透透遲遲。雲流而日行兮。又洵洵業業。海運而天聲。靈旂洪順。翕赫欻霍兮。擢拏龍虎而亂鯤鵬。雄鷺憺威而震伏兮。柔良化禮而肅清。弛天威。戢天戈兮。固已熄威蚩尤而折檣槍。執飛廉。圍商羊。屬之有司兮。羲和磨刮披拂。盡獻其光明。蓋傾都空閭。翹首跂足。俯窺履屐。傍覘佩玉者。忽焉不知手之加額。口之成祝也。于是背都城。望帷宮。郊垌坦其迤邐兮。場圃既寒而畢功。頽青雲以連屬。燦虹霓之經緯。紫微下屬于兩觀。句陳錯施于萬雉。扶傾之神。仰立而拱。翔德之龍。下視而曳。疑神變之欵成兮。涌九地而出時。連廡千柱。廣殿萬杙。飛甍鬪桷。洞牖屹壁。酸股之隅。眩目之極。唐洛執算而莫計。班倕操斤而自惑者。類非資材于斲墁。而皆機杼之紡績也。一室之用。足以溫一家。一宮之費。何啻衣一國。驚霆之蹕。既震。洶壑之聲。咸寂。斂齋寢之靜深兮。何清虛而邃密。天子方端儼而虛。一多儀未舉。精意已塞。甲夜始晦。嚴鼓載作。飛斂走伏。神讐鬼愕。望舒騰精以燭宵兮。元冥收威而布德。靈囂五震。軫車將中。天子乃披袞執玉兮。齋

明莊肅之誠。動于進趨。表于形容。千燎具揚。萬炬畢融。上揜炎惑。旁爍燭龍。近爲朝陽。遠爲融風。赫赫曦曦。煌煌輝輝。列次之士。野屯之師。歸如酌醕。醪而御兼衣。黃流汪洋。璧玉照徹。祥祲衡布。協氣下浹。音爲樂和。形爲人悅。白質之獸。簫聲之鳥。紛披雜沓。應奏而舞節。陟降既周。燎烟始升。奔星走虹。奉璧薦牲。豐隆奔馳。而仰鶩兮。祝融焜煌。而上征。開閭闔兮。闢清都。后帝燕兮。百神愉。圓錫蓋兮。方獻輿。岳輸固兮。溟効濡。于是禮備樂成。整車而旋。萬類環極。端門闢天。賞出千庾。恩流百川。北包大壤。南盡島蠻。西越流沙。東窮海壖。令未脫口。雷運風傳。野無窮人。獄無宿愆。破械解縲。負帛囊錢。車反其舍。士復其伍。効技呈才。千鐘萬鼓。天子舉酒以屬羣公。咸曰休哉。天子之功。系曰於穆聖王。建皇極兮。嚴恭精禋。帝來格兮。柔祗並位。儼牲璧兮。文祖在坐。臨有赫兮。於惟祖宗。有常則兮。諱兵畏刑。後貨食兮。政有損益。茲不易兮。帝則鑒之。穢穀錫兮。兢兢業業。日一日兮。三載一祀。年萬億兮。

游東湖賦

紛不知吾之所如兮。獨漫漫而若狂。乘醉飽之餘力兮。遂陟巘而緣岡。惟大冬之栗烈兮。莽川澤之茫茫。農功休乎場圃兮。平陸散夫牛羊。憫大木之百圍兮。慘赤立而無裳。鶴鶴羣鳴而下上兮。雜篔竹之青黃。忽平陸之既窮兮。漸積水之汪洋。曰是爲齊安之東湖兮。右派合乎濤江。荒灣寂寥而葭葦兮。懸疏罾于夕陽。爲舉網而無獲兮。嘉魚逝而洋洋。弔村落之柴荆兮。哀淮夷之陋荒。呼徒侶而還歸兮。陰風振而塵颺。畏星昴之將中兮。冒元夜之飛霜。願謂童子。汝其賦詩。爰有小子。裒然致辭。歌曰。歲窮木落兮。大澤空。

雁宵征兮天北風。曷不飲酒兮御元冬。歸來歸來兮樂未終。余曰汝歌置之。乃歌曰。臨山川兮懷故鄉。歲窮陰兮晝不暘。升高堂兮潔余樽。耿余思兮古之人。

問雙棠賦有序

雙棠者。予寓陳僧舍堂下手植兩海棠也。始余以丙子秋。寓居宛邱南門靈通禪刹之西堂。是歲季冬。手植兩海棠于堂下。至丁丑之春。時澤屢至。棠茂悅也。仲春且華矣。余約常所與飲者。且致美酒。將一醉于樹間。是月六日。予被謫書治行之黃州。俗事紛然。余亦遷居。因不復省花。到黃且周歲矣。寺僧書來言花自如也。余因思茲棠之所植。去余寢無十步。欲與鄰里親戚。一飲而樂之。宜可必得。無難也。然垂至而失之。事之不可知如此。今去棠且千里。又身在罪籍。其行止未能自期。其于棠未遽得見也。然均于不可知。則亦安知此花不忽然在吾目前乎。因賦問棠以自廣云。

寓舍之壤。既膏且腴。手植兩棠。于堂之隅。風來自東。冰雪融液。與視吾棠。既葩而澤。乃沽我酒。又命我人。期一醉于樹間。聊快酬于芳春。夾鐘之初。謫書在門。陸走千里。止于江濱。天星一周。穆然舊春。想見吾棠。粲然含姿。俯睨舊堂。今居者誰。婉如怨而有待。淡無言其若思。嗟乎。始種自我。其享將獲。盈我旨酒。會我賓客。一酌未舉。俛仰而失事。至而驚其初。孰測。惟得與失。相尋無極。則亦安知夫此棠不忽然一日復在。余側也。且夫棠得其居。愈久愈敷。無有斧斤斲傷之虞。我行世間。浮雲飛蓬。惟所使之。何有南東。夫以不



移。俟彼靡常。久近衡從。共志必償。歌以訊之。用著不忘。

柯山賦

入東門而右回者。原迤靡以相屬。拔磅礴以陸起兮。是爲柯山之麓。其上蕭森而崑鶴兮。冠萬竿之修竹。下礪礪而堅密兮。拱高林與喬木。散雞犬于危阨兮。雜茅茨與夏屋。通樵牧之蹊逕兮。路縱橫而斷續。撮土石列。暗竇谷虛。鳴鳥上下。伏獸號呼。俯江流之蕩溢。招列山之蟠紆。林鬱作態而蔽虧兮。風雲効技而卷舒。固可以開闔陰陽于一氣。寅饒日月于天衢。爰有窮人。擢然無歸。曠四海無所投其足兮。后帝命我于山之隈。庇茅蓬之數椽兮。撫枵腹而常飢。時醉飽而自得兮。亦杖履而遨嬉。逾山而東。席門草藩。爰有君子。于茲考槃。自種自食。鄰里莫干。圖書滿家。兒稚飢寒。相見輒喜。有時不冠。寄寓事于一笑兮。不知食糲而衣單。吾不加物以一毫兮。亦莫受人之煖暄。悟紛華之多虞兮。幸寂寞之至安。飲我薄酒。懽有餘。噉我豆羹。甘而腴。隱几而休讀我書。乃曳杖歌曰。升柯之巔。明遠眺兮。築柯之崦。可以老兮。終古不忒。天之道兮。于子而行。無喪吾寶兮。

卯飲賦

張子晨起。落然四壁。千林霜曉。四顧寒寂。先生惘然而不自得。顧視壁間。若有物焉。短脰魁腹兮。長喙旁啄。而椎鬻上直也。雖未知其何祥。而津津然有喜色矣。于是童子趨而進曰。是有客曰麴生者。願奉先生于頃刻。先生欣然。三揖而進之。蓋其氣盎盎。列而浮兮。其聲瀏瀏。和而幽兮。其質醲醲。毅以柔兮。先生曰。

甚矣。予之不敏也。今日乃知從子之遊。于是體之栗然寒者溫。心之鬱然結者散。已大忘于寒暑。尙何有于夜旦。揖麴生而告之曰。吾將旦旦與君周旋。旣導君以良辰。又餞君以芳鮮。而可乎。麴生對曰。斥子之泉。吾泉出兮。枵吾之腹。君腹實兮。陋彼昏之獻嘲。何啻富子于一日。

鳴雞賦

先生間居學道。昧旦而興。家畜一雞。司晨而鳴。畜之旣久。語默有程。意氣武毅。被服鮮明。峨峨朱冠。丹頸元膺。蒼距矯擢。秀尾翹騰。奉職有恪。徐步我庭。啄粟飲水。孔肅靡爭。山川蒼蒼。風霰宵凝。黯幽窗之沈沈。况余夢之欲驚。萬里一寂。鐘鼓無聲。聞振衣之膈膊。忽孤奏而泠泠。委更籌之離亂。和城角之淒清。應雲外之鳴鴻。弔山閒之落星。歌三終而復寂。夜五分而旣更。萬戶皆作。車驅馬行。先生杖履而出。觀大明之東生。

暑雨賦

提九山于空虛。忽並擊而俱裂。壅百川于河漢。乃防隕而一決。哀下生之微生。何足供夫摧折。方朱鳥之宵中。歲仲夏兮。大熱雖愎炎之一快。俄鬱蒸之莫洩。叢百指于環堵。顧杖屨之安設。委熏風于九旬。淫疾苦于百節。付六鑿于渾沌。獨天游而神悅。忽倚然而輕舉。固已窺寒門而蹈冰雪。攬北斗而酌天酒。覲上帝于元闕。聊逍遙兮窮年。俯故居兮螿埵。

蘆藩賦

張子被謫。客居齊安。陋屋數椽。織蘆爲藩。疎弱陋拙。不能苟完。晝風雨之不禦。夜穿窬之易干。上雞栖之蕭瑟。下狗竇之空寬。先生家貧。一裘度寒。曾舂篋之不卹。何藩籬之足言。鼓鐘于宮。聲出于垣。中空然而無有。徒望意而輒還。故吾守此敗廬。其固比夫河山。若夫朝暘不出。微霰既零。聲如跳珠。淅淅可聽。及夫衡門暮掩。烏雀就栖。挂荒山之落景。絡衰蔓之離離。其下榛草。樵蘇往來。螻蚓出入。羊牛覘窺。先生趺然杖藜過之。瞻顧四隅。憫然歌之曰。公宮侯第。兼瓦連蔓。紫垣玉府。十仞塗青。何嘗知淮夷之陋俗。窮年卒歲乎柴荆也哉。

### 燔薪賦

歲暮苦寒。烈風不休。先生家貧。衣無重裘。讀書夜闌。爐炭已灰。先生瑟縮。凄然不怡。顧謂童子。與薪偕來。童子抱薪而來。曰。是薪也。陳之壁間。自春徂冬。風日所熯。埃塵所蒙。固藩液之乾竭。乃外槁而中空。惟利簇燔。無所獻功。與火相得。赫然大烘。堅枿勁節。久而後燃。既羣枯而效技。又熒熒而不烟。于是先生欣然。環坐皆喜。或裸股赤足。或引手張臂。窮谷蕭條。薪炭如土。蓋取之而不竭。顧此樂之甚富。又何必琴材修直。獸材攫搏。漢壁之可效媛。魏宮之金辟寒。誰知空山寒夜之叟。敢傲溫于狐貉之前。原注。今供上方炭。率斲成琴材。胡桃文。鴉鵲色。

### 菊賦有序

予到官之明年。以事之東海道漣水。漣水令盛僑以蘇子瞻先生後杞菊賦示予。予不達世事。

自初得官。卽不欲仕。而親老矣。家苦貧。冀斗升之粟。以紓其朝夕之急。然到官歲餘。困于往來奔走之費。而家之窘迫益甚。向日悲愁歎嗟。自以爲無聊。旣讀後杞菊賦。而後洞然。如先生者。猶如是。則予而後可以無歎也。

有蓬四垣。張子居官。童子晨謁。有駒在門。張子迎客。平生故人。予致其勤。餽客以殮。插露菊之清英。翳霜杞之芳根。芬敷滿前。無有馨羶。客愠而作。謂余曷然。張子始歎。終笑以言。陋雖爾棄。分則余安。子聞之乎。膠西先生。爲世達者。文章行義。徧滿天下。出守膠西。曾是不飽。先生不愠。賦以自笑。先生哲人。太守尊官。食若不厭。况於余焉。不稱是懼。敢謀其他。請卒予說。子無我嗟。冥冥之中。實有神物。主司下人。不問毫髮。夫德不稱。享者殃。勞不稱。費者罰。予身甚微。余事甚賤。聊逍遙于枯槁。庶自遠于人患。客謝而食。如膏如飴。茲山林之所樂。予與爾其安之。

涉淮賦

涉清淮之浩蕩兮。聊以豁吾之幽憂。轉峽石而下泛兮。觀波濤之複流。何佛廟之巍峨兮。隱于兩山之幽。眺東崖之飛閣兮。納萬里之清秋。昔淮人之倔強兮。恃江左而不賓。方中原之多故兮。遂竊帝而稱鄰。遭世宗之勃興兮。乘累聖之威神。盡疾馳而奉命兮。戈一揮而遂臣。始盤桓于壽春兮。蓋嘗挫而益振。驅貔虎于順流兮。臨長江之廣津。馳千里之玉帛兮。擁百萬之精軍。計其一時之氣兮。固叱咤而風雲。嗟百年之幾時兮。山川儼其如新。忽人事之幾變兮。撫墟廟而湮淪。訪遺事于樵夫野人之談說。指餘迹于荒城。

故壘之荆榛。徒見夫雲悠悠而朝出。水漠漠而東流。飛沙驅于晴渚。聽夜舫于行舟。彼時豪盛。此日廢昔。人功業。今人愁。嗟夫。旦之心。暮不可求。前之迹。後不可再。胡爲寂寂之前古。乃以興亡而感慨。雖物至盛者。其存也宜久。勢極大者。其亡也可驚。方登臨而遠想。豈獨予兮忘情。

後涉淮賦有序

甲寅之秋。自正陽涉淮。作涉淮賦。既至泗之臨淮。邑之東南皆淮也。朝游夕濟。凡淮之驚畏風濤之變。無不歷之矣。今秋。又以事之東海。至漣水。入漣河。舟人告予曰。淮水自是入海矣。予生二十有二年。吳楚秦蜀之國。來往殆徧。竊悲其跡之不常。作後涉淮賦。以自廣云。

浩淮流之湯湯兮。蕩余舟以沿洄。嗟我居之不常兮。未期歲而再來。始進棹于正陽兮。睨下蔡之窮城。界陳許之北壤兮。望荆塗之兩山。緬川原之迴複兮。思禹功而慨然。爰係舟于徐邑兮。浸淮隅之兩壩。駕長帆于朝風兮。凌星河于夜湍。豈所覽之未周兮。恨未窮其本源。忽行役而南去兮。稅吾櫂于清漣。指溟渤于西北兮。曰此淮流之所還。彼百川之歸海兮。吾固知其必然。惟循源而極末兮。哀予迹之未安。當天時之晚秋兮。風露慘其既至。山峭峭而瘦出兮。水紺潔而無滓。曳孤蓬而忽驚兮。出游鱸于短葦。白鷺飛而下來兮。翩如避世之君子。酒芳香而盈盃兮。吾陶陶而日醉。方頽然而遺形兮。孰卑高而賤貴。彼貴者樂其府兮。富者懷其資。無二者之累予兮。何羈游之足悲。窮天下之奇觀兮。極覆載之所藏。膏吾車而勿反兮。畢吾世而徜徉。


雨望賦

談海天之蒼茫。觀驟雨之霽霈。飄風擊而雲奔。曠萬里而一蔽。卒然如百萬之卒。赴敵驟戰兮。車旗崩騰。而矢石亂至也。已而餘飄既定。盛怒已泄。雲逐逐而散歸。縱橫委乎天末。又如戰勝之兵。整旗就隊。徐驅而回歸兮。杳然惟見夫川平而野闊。夫雲霞風月之容。雷雨電雹之變。非巧力所能爲。蓋人間之絕觀。必也登雄樓傑閣之崢嶸。憑高山巨海之空曠。徹除耳目之障蔽。而後能窮極變化之奇狀。嗟我居之卑湫兮。束觀聽于尋丈。顧所欲之莫得兮。徒臨風而惆悵。

暮秋賦

嗟予志之莫就兮。哀天時之不予謀。歲冉冉以將暮兮。無以蕩吾之幽憂。昔吾之既有知兮。獨信道而不顧。鞭吾駒之不戒兮。眇一世而獨驚。儼章甫以自好兮。安知越人之異容。恃所持之不欺兮。謂彼此之情同。夫何事物之多故兮。因少愚而老智。彼善惡豈有常兮。固繫夫一世之賤貴。或指礫以爲玉兮。人皆知其不然。衆旣訛而莫返兮。事隨信而名遷。僞言實于衆舌兮。至寶賤于獨知。正無助者必危兮。惡乘朋而或濟。決大河而東奔兮。挽予舟而上泝。嗟爾楫之幾何兮。蛟龍鬱其方怒。外旣揆而內度兮。考舊好之同異。韜九襲以深藏兮。固可死而不可試。卷杜蘅之幽佩兮。苞芳蘭之翠衣。畏久畜之不揚兮。時竊陳以爲戲。怨所資之不售兮。非達人之宏規。彼廢興之有命兮。何憂樂之足係。奏吾琴之憤怨兮。酌吾酒之冽清。攬芳桂與秋菊兮。聊以駐吾之頽齡。吾又將之夫深山兮。遂絕世而遠去。身九浴而後衣兮。齒三滌而後

阻納冰霜於胸中兮。蕩焦膈之宿汚。求仙人之奇術兮。與彭咸乎爲伍。彼君子之蹈常兮。曷急世之有知。聊逍遙以卒歲兮。樂天命而不疑。





# 柯山集卷二

## 賦

超然臺賦原注。蘇子瞻守密。作臺于園。名以超然。命諸公賦之。予在東海。子瞻令貢父來命。有序。或有疑于超然。曰。古之所謂至樂者。安能自名其所以然耶。今夫鳥之能飛。獸之能馳。與夫人之耳目手足。視聽動作。自外而觀之者。豈不以爲大樂乎。然鳥獸與人。未嘗自以爲樂也。古之有道者。其樂亦然。又安能自名其所以然耶。彼方自以爲超然而樂之。則是其心未免夫有累也。客應之曰。吾豈以子之言非耶。吾方有所較而後知超然者之賢也。予視世之賤丈夫。方奔走勞役。守塵壤。握垢穢。嗜之而不知厭。而超然者方遠引絕去。芥視萬物。視世之所樂。不動其心。則可不謂賢耶。今夫世之富人。日玩其金玉而樂之。是未能富也。忘其所有而安之。是真能富矣。夫惟有之。是以貴其能忘之。使其無有。則將何所忘耶。子以爲將忘超然爲真超然。則其初必有樂乎超然而後忘可能也。子以爲樂夫世之樂者乎。然則子亦安知夫名超然者果非能至樂者也。賦曰。

登高臺之岌峨兮。曠四顧而無窮。環羣山於左右兮。瞰大海於其東。棄塵壤之誼卑兮。揖天半之清風。身

飄飄而欲舉兮。招飛鶴與翔鴻。莽丘原之茫茫兮。弔韓侯之武功。提千乘之富強兮。憑百勝而稱雄。忽千年而何有兮。哀墟廟之榛蓬。有物必歸於盡兮。吾知此臺之何恃。惟廢興之相召兮。要以必毀而後止。彼變化之無窮兮。嗟其偶存之幾何。聊徼樂於吾世兮。又安知夫其他。或有疑夫超然者兮。豈其知道而未純。曰彼天下之至樂兮。又安能自名其所以然。惟樂而不知所以樂兮。此其所以爲樂之全。彼超然而獨得兮。是猶存物我於其間。客有復之者曰。子知至樂之無名兮。是未知世之所可惡。世方奔走於物外兮。蓋或至死而不顧。眇如醯雞之舞甕兮。又似乎青蠅之集汙。衆皆旁視而笑兮。彼獨守而不能去。較此樂於超然兮。謂孰賢而孰愚。何善惡之足較兮。固天淵之異區。道不可以直至兮。終冥合乎自然。子又安知夫名超然兮。果不能造至樂之淵乎。

鳴蛙賦有序

予寓山陽學舍。夏大雨。屋四隅成塘。聚蛙以千計。鳴聲不絕。夜爲不能寐。客有獻予以殺蛙之術。曰。投子藥一丸。蛙無遺類矣。童子將用之。予曰。不可。復爲賦示之。

夏雨初止。積潦過尺。有蛙百千。更跳互出。幸此新霽。夜月清溢。我勞其休。歸偃於室。於時蛙鳴。若嘯若啼。若訴若歌。若懼而悲。若喜而語。若怒而詬。若噦而嘔。若咽而嗽。瘖者之呼。吃者之鬪。或急或緩。或清或濁。若羌絲野鼓。雜亂無節兮。又似夫蠻歌獠語。詭怪之迭作也。爾其困於泥潦。失其所處而悲。又若夫旱熯既久。得其所處而樂也。爰有童子持燭來謁曰。蛙羣夜鳴。君寢其聒。考之周官。洒灰驅蛤。君其教之。予得

盡殺子語童子爾無是酷爾樂而歌而哀則哭哭則悲嗟樂有聲曲聚語羣爭引吭而呼一日之間不寧須臾蛙不汝嫌汝奚蛙誅萬物一府誰好就惡爾奚自私己厚蛙薄參通彼己樂我自然弭爾怒心置燭而眠夜半張子援枕而吁顧謂童子記吾言歟前言未究請卒吾說物各有時夫誰敢過爾觀夫春露初霽朝華始敷文羽清喙飛鳴自如若奏琴箏而和笙竽清耳悅心聽者爲娛及夫陽春旣徂炎火將極惡草蕃遮淫潦滯積蛙於此時生養蕃息跳梁號呼意氣橫逸子如之何時不可逆時乎時乎美惡皆然當其盛時誰得而遷及其雪霜旣降木實草衰飛蠅聚蚊孽無所施於是此蛙斂吻收足厖然土中一聲不出黨散巢披不可終日盛不可常興衰迭乘子姑忍之奚以殺爲哉

### 齋居賦

仲夏之月陰氣始至陽旣盛而初剝陰浸亨而用事水伏畏涸火燎方熾其於人也心實過炎而腎受其弊惟人之生受命在子推卦曰坎於行爲水微陽所潛元氣之始故火甚烈則正氣或因而衰則水受害者君子之所深畏於是屏事燕息滌慮齋居旣靜事以無刑又遠眺而高居却紛華而弗陳與淡泊乎爲徒絕嗜望慾愛精齋神聲色不御滋味弗親冲然與和俱遊湛兮以道合真故能體強志寧愉樂壽考遠去疾癘保此難老嗚呼苟能推此以盡道考此以察物則豈惟齋戒以御時宜其顛沛而勿失且夫冰炭相乘利害交至隕真盜和豈獨陰沴道心惟微易失難常困於侵陵有如微陽則洗心滌慮以却外垢虛中保和以全天君故能涉至變而不濡更萬變而常存蓋將窮年以齋居豈特養生而善身乎

蜘蛛賦

魚游假淵。鳥棲求木。而我所宅。獨取諸腹。巢於牆屋。人不子取。朝蠅暮蚊。食人所惡。彼殘物以養。而無益於世。雖名人兮。斯蟲是愧。

得友賦 原注。答子邕。

予趨世之僻迂。獨子子而無朋。信所樂以直前。嘗媒仇而賈憎。惟物態之多艱。撫危心而自驚。甘默默以退藏。包薄技而無成。何吾迹之不常。旅成周之故京。眷吾遊之悠遠。耿誰語兮吾情。惟夫子之好修。昔固聞乎德聲。獨顧我而忘勤。握未煖而心傾。發鍵鑰而不疑。奏金石之鏗鏗。內端肅而粹溫。外炳煥而清明。嗟我鄙而子奇。謂欲合而莫能。援古義而見交。愧此意之何勝。既兩盡而莫疑。亦交規而共評。驅昔邁之無餘。撫新樂而生矜。豈目前之懽愉。實未得乎平生。惟清洛之名都。窺園沼之清澄。語寒堂之夜燭。醉春圃之朝英。徵逸士於古初。亦窮微而造精。投明珠之的歷。報美璧之煌熒。惟此樂之無窮。使我愛日而兢兢。雖所歷之萬殊。願勿疾兮茲誠。

懷知賦

嗟子生之苦艱。涉世故而多違。登羣嘲而衆侮。獨子子其從誰。嗟若人之好修。外洵直而中奇。挈子手而指津。謂子車之不迷。遵常度以夷行。正六轡而安馳。嗟終日而無禽。曰固然而曷疑。惟言動之合符。若方圓於矩規。振高言於皇極。流餘麗於奇辭。沃道德以相酬。心厭滿而忘飢。愛日月而畏別。卒悠遠而多懷。

跋予望兮莫瞻。將駕言其從之。何出門之多艱。頓我馬以嗟咨。山叢叢而造天。車欲進而畏摧。臨江湖以浮舟。蛟龍鬱其揚鬣。路幽迴而莫通。心鬱塞而增悲。贈瓊瑤以致情。恐所託之吾欺。惟至技之難投。或舉世而莫知。倘一遇而見明。蓋至樂之無僂。彼取舍之迷方。或骨肉而相遺。苟我心之不察。雖親愛而何恃。故烈士之報知己。或殺身而不辭。豈以生而易名。誠內激而忘私。風蕭蕭以戒秋。蟬嘒嘒而鳴悲。白露團兮夕涼。庭木颯其先衰。羈我馬於東周。蓋三歲其於茲。老駸駸而來逼。心鬱鬱而不夷。願所樂之莫從。託宵寐兮庶幾。酌尊酒以忘憂。寫我心兮陳詩。

遣幽賦

居子子以無與兮。出莫知其所之。獨端居以終日兮。耿然默以長思。古之人不可得而見兮。存者滅略之遺辭。顧一世之異情兮。予誰者其從之。惟我生之拙迂兮。嗟所慕之名奇。揭廉清之遺風兮。曰吾其進難而退易。百驅不加於跬步兮。却轡疾返而莫追。踐斯言之不欺兮。庶吾心之無愧。日月忽其遷流兮。老忽忽而既來。惟所蹈之日迷兮。撫前心而自非。欲改故而圖新兮。從靈龜而問疑。兆改橫而上從兮。史爲予而告辭。橫爲室而善處兮。上從直達其無職。豈外拘而中泰兮。或者既塞而將遂。保爾守而無變兮。神明於汝其遺之。相利害而爲術兮。彼鄉人其猶恥。美靈龜之告繇兮。得我心之所止。彼躑躑其焉往。聊安安以自恃。歲冉冉以將老兮。草木颯其變衰。元蟬號乎高柳兮。盜菡萏於清池。宵蟲悲鳴以相語兮。朔雨振迅而南窺。嗟吾客於東周兮。周天星之三移。寫我憂以命駕兮。憑高明以遠視。覽平田以芒泱兮。瞰清格

之東駛。山重複而南積兮。萬嶺疊疊以鱗次。微雲覆霽以忽布兮。孤翼滅沒而高逝。熊耳高高而西峙兮。女兒奮湧而南危。東平川於兩閒兮。散佃漁於平地。雞犬密其相聞兮。溝塍布而如碁。牛羊閒以就牧兮。烏鳥號呼以羣嬉。登故國之餘墟兮。望遺宮之積基。傷者來世而無窮兮。樂者昔人其既止。惟達觀其超忽兮。等廢興於一視。考物變以自樂兮。遺餘情於酒醴。大人無卽而非樂兮。淺夫係物以自治。彼方窘我以局促兮。我則顧步而廣肆。制憂樂於在彼兮。夫何貴乎明智。忘吾憂以洋洋兮。將以語夫君子。

哀伯牙賦

伯牙鼓琴。後世無知。我哀伯牙。似智而愚。天地之間。四方萬里。知爾琴者。一人而已。鍾子既死。其一又亡。欲彈無聽。泣涕浪浪。已奏已闕。欲詰不可。偃塞滿懷。無所傾寫。折楊皇夸。巷歌里曲。入邑娛邑。入國悅國。回視伯牙。面有矜色。夫操至伎者。必不和衆人之耳。而媚衆耳者。又善工之深恥。達衆者。常子子其無與。而冒恥者。乃身安而獲利。則亦安知夫至藝之非禍。而庸工之非社也。嗟夫。將爲至巧者。必無顧於終身之無與。則至巧之於人。乃不祥之上器。操不祥之器。終身而不知。則伯牙者。乃後世之深戒。

石菖蒲賦 有序

歲十月。冰霜大寒。吾庭之植物。無不悴者。爰有瓦缶。貯水斗許。間以小石。有草鬱然。俯窺其根。與石相結絡。其生意暢遂。顏色茂好。若夏雨解籜之竹。春田時澤之苗。問其名。曰。是爲石菖蒲也。攷諸本草。則所謂養性上藥。仙聖之已試者也。因賦之云。

歲寒風霜。水落石潔。大木百圍。僵仆摧折。有草於此。寸根九節。曾是莫傷。華然茂悅。若處廣深。隱奧密而不知戶牖之外。平地尺雪也。將糜而餌之。私其益於我躬。則不幾於奪也。曷若致之吾前。儀之以自修兮。庶乎比德之珷玦也。

病暑賦

皇昌運之元祀兮。予出守乎清潁之區。背國門而南驚兮。弭楫乎太昊之墟。方炎夏之隆赫兮。閱時澤之不濡。魃乘時而行虐兮。盜威烈乎陽鳥。駕畢方而驟熒惑兮。回祿爲其前驅。燼所及於一燎兮。何有瓦石與璠璣。豐隆致其微陰兮。飛廉蕩覆而無餘。野曠曠而揚塵兮。何蕭艾之芬敷。應龍矯首於下澤兮。僅自免於槁枯。烏呀咻而忘飛兮。獸逃穴而深居。嗟人胡獨不能兮。無乃欲息而被驅。昔斬山之秋筍兮。因冰卷而玉舒。効功能於么廢兮。曾何足以寧吾軀。飽風而爲蜩兮。又欲泳水而爲魚。出寒泉於深井兮。竭筋力於轆轤。不計腹之所受兮。尙問山藟麩麥之有無。亂曰。陰陽循環。靡窮極兮。時至而變。有常則兮。融液金鐵。爍山石兮。謹視其報。在朔易兮。元陰大冬。冰雪積兮。無畏其機。備其極兮。補完裘褐。戒紡績兮。保我歲寒。以終吉兮。

喜晴賦

積雨初止。萬境聲乾。星漢昭回。夜客尙寒。晨起載欣。朝暉在門。起往從之。清明肅然。蚓安其穴。蝸不遺涎。還開通於滯濕。失沮洳之墊昏。列缺弭轅。豐隆偃麾。羲和緩轡而安行。背扶桑而經天街。顧大田之多荒。

乃愀然而興哀。聊雷霆之一嬉。遽下土而罹災。詔龍螭使伏蟠。息憤怒之喧噴。曰。予悔禍於斯人。勞苦雨師。以一杯惠我農師。豈不休哉。

南山賦原注寄張嘉甫

南山巖巖兮。其下有人。佩玉而握珠。刻意魯叟之古經。不習世儒之臆書。我頃見之於宛邱。貌秀皙而眉疎。別去忽兮幾時。面蒼瘠而垂鬚。愛德器之老成。資巧琢於瑤璵。問所與之爲誰。亦黃槁之仙癯。禁八馬之超驚。同芻豆於羣鴛。時慷慨而長鳴。恥賤工之附輿。我行世之多艱。三年困兮江湖。幸天恩之放還。過都梁兮躊躇。奉兩月之周旋。越長江之馳驅。屢飲我於山間。出翩躚之兩姝。舟師告予以當行。具檣櫂於斯須。歲方春而寒驕。犯冰雪於野墟。雲漫漫兮垂天。風飄飄兮切膚。穉甦翳於宿莽。妍柳秀於羣枯。泛羽觴之清冷。聊覽物以爲娛。思佳人兮天末。望莫見兮愁予。

秋風賦

張子夕坐於堂之南軒。有風颯然。來自西方。感乎人心。異於尋常。初披偃乎草木。亦泛動乎軒窗。張子曰。是風也。所以成歲而佐陽者乎。時也。朱火就謝。七月始涼。既導迎於肅殺。又介紹於雪霜。其中人也。萬竅洒然。汗澤爲乾。纖絳魯縞。不勝其單。其加物也。未敗其形。先傷其情。未隕其生。先奪其英。使之嗒然委者。見於顏色。黎然槁者。動於聲鳴。吾嘗中夜而聽之。淅瀝颼颼。羣動百蟲。怨泣悲吟。動人忡忡者。秋之聲。旦起而望之。清明高潔者。秋之容。於是庶草効實。九穀獻功。旣彌於野。又嘗於宗。感天時之不留。念歲律之



將窮。張子曰：吾何爲乎？戒裘褐以備嚴冬而已。

南征賦原注贈張嘉甫

予文窮而莫諱兮。顧四方其何適。毋寧征於江右兮。毛土膏其可食。抱朝暮之勝氣兮。西山吾以爲宅。風  
予帆於晝日兮。予朝發於赤壁。擿玉壘之下流兮。逝蓬飛於一息。迅沮漳而橫入兮。滙揚瀾於左蠡。婢吾  
目而無恨兮。濤猛獸以噬羸。霽光風於木末兮。俟餘波猶未肯平。迷失道而問津兮。案此下脫三字御於  
朱明。就漁父而陳詞兮。予非湘纍之獨醒。父告予以不治兮。南樵舍而自成。破隴畝而溢流兮。石險很而  
當道。豈舟人之肅洽兮。艇觸撥而欲倒。繫予車於桑本兮。予猶可以徒行。夷予竈使不得炊兮。予猶可以  
乞隣。曰：厚土之瀾漫兮。予騷騷無以爲家。雖斯人之可懷兮。烏猶長鳴以歎嗟。黃蒲田之所播植兮。歲有  
秋而登場。旣狼戾而竭隣兮。已獨賦乎廩倉。饌上方之玉盤兮。上曰：飽斯人之德。歲協洽而蘄兮。味柔嘉  
予未得食。染予指於鼎兮。豈不同此臭味。使持節於十郡兮。民樂得此父母。顧予懷之倉卒兮。謂一寒之  
何故。雖解衣推食兮。曰：此小惠。汝弗德我。我九世之良醫兮。藥神膏而可以破汝腸。賦九言而九頓首兮。  
度百世而用足。閱一世之風波兮。曰：餘皇吾以爲歸宿。

碧雲賦

蹇臨高而延矚。悵天邊之碧雲。緬不知予何思。情空至兮。繽紛懷幽蘭之令姿。方揚靈乎上春。顧來者之  
非其人。使暴露乎埃塵。我有旨酒。與子殷勤。終闕莫致。實勞我神。白日西馳。去故就新。發采舒光。念當及

晨。

三酌賦

出公門而偃私。酌旨酒於良辰。緬再酌而三酌。恍如對乎佳賓。畏局促之傷懷。聊流暢乎心神。懲荒溷乎無算。悠然合乎禮文。蕩志文史。晤言詩書。世醉不足。我醒有餘。頤妙物表。韜精道樞。冥會獨應。誰知我娛。

人日飲酒賦

歲後七日。其名曰人。愛此嘉名。酌酒懽欣。豈木行之始和。生庶類而施仁。又曰。人者三才之中。將中和之肇布。易嚴殺之餘冬也。乃命婦子。班坐行觴。酌已相祝。壽考無疆。有否必泰。無窮不通。請觀庭下之枯折。霜霰消而敷榮。羽蟲感陽而羣嬉。況乎雲間之飛鴻。於是三酌既醉。喜有所得。安局促而不歎。悟倚伏之無極。

吳故城賦

亂吾舟兮大江。夕余濟兮樊口。登武昌之故墟。弔西門之衰柳。出東郊而南眺。訪遺城之培塿。嗟頽牆之迤靡。半已平乎耕耨。雜谿澗而沮洳。稻冉冉而將秀。曰。是吳王之故宮兮。昔孫仲謀之所有。當弊漢之委地。羣兇聚而啄剖。偉紫髯之永圖。獨穴據乎江右。豈無意於雍洛。易虛夸爲善守。親其作都於武昌。夫何險陋而卽安。是爲大江之上流兮。於備敵焉不繁。顧諸將之凡才。豈袁曹之敢班。欲身當中原之一面兮。事便時利一葦濟乎濤瀾。當是之時。兩觀萬雉。縹闕應門。內擁燕趙之美。外屯貔貅之軍。笙磬鐘鼓之喧。

闐旗旆車馬之繽紛。固已包蒙川澤。震耀山原。安知夫千載之後。陵谷易位。夫何遺珠與棄玉。顧此遺墟之將圯。於是與客休於祠宮。披樵蘇之微路。嗟牛羊之入室。固牲酒之不具。與客愀然。三歎而去。予近讀曹植諸小賦。雖不能縝密工緻。悅可人意。而文氣疏俊。風致高遠。有漢賦餘韻。是可矜尚也。因擬之云。



柯山集卷三

古樂府歌詞

君家誠易知曲

君家誠易知。易知獨難忘。西風牖頭吹葉黃。蟲絲當戶理秋光。翠屏碧簾生朝涼。牀頭蟋蟀見焚香。鮫人綉纈雙鳳凰。上元綠鬢遮耳璫。來車去馬官道旁。碧雲傳情何處郎。相望玉樹啼寒螿。

于湖曲有序

蕪湖令寄示溫庭筠湖陰曲。其序乃云。晉王敦反。屯於湖陰。帝微行至其營。敦夢日遠之。覺而追不及。故樂府有湖陰曲。按晉地志有於湖而無湖陰。本記云。敦屯於湖。又曰。帝至於湖陰。察營壘而去。頃予遊蕪湖。問父老湖陰所在。皆莫之知也。然則帝至於湖。當斷爲句。乃作於湖曲。以遺之。使正其是非云。

武昌雲旗蔽天赤。夜築於湖鋒洗鏑。巴滇驟駿風作蹄。去如滅沒來不嘶。日圍萬里纏孤壁。兵氣如霜已潛釋。蛇矛賤士識天顏。玉帳髯奴落妖魄。君不見銅駝陌上塵沙起。鐵騎春來飲灑水。浮江天馬是龍兒。蹙踏揚州開帝里。王氣高懸五百秋。弄兵老漫空白頭。石城戰骨臥秋草。更欲君王分上流。

襄陽曲

西津折葦鳴策策。蟾蜍光入芙蓉白。山頭不雨賈船稀。日日門前江水窄。將欲烜赫招行人。旋起丹樓照長陌。銀屏深蔽玉笙閒。自擘新橙飲北客。倏離暫合心未果。淚瑩雙眸爲誰墮。

寄衣曲

秋風西來入庭樹。攀條正念征人苦。空窗自織不敢任。鳴機愁寂如鳴鷓。練成欲裁新絲香。抱持含愁叔姑堂。別來不見衣覺窄。試比小郎身更長。

江南曲

江蒲芽白江水綠。江頭開花自幽淑。人家晨炊欲熟時。旋去網魚惟所欲。往來送租只用船。未省泥沙曾汙足。有錢買酒醉隣畔。終日數口常在目。不學長安貴公卿。每念離心寄朱轂。朝遊巖廊暮海島。譴人未歸身自到。

怨曲二首

白首南朝女。愁聽異域歌。收兵頡利國。飲馬胡盧河。毳幕風霜久。穹廬幾月多。雕窠城上宿。吹笛淚滂沱。祖席駐征橈。開帆復信潮。隔筵桃葉泣。吹管杏花飄。船去鷗飛闊。人歸鹿上橋。別離惆悵淚。江鷺宿紅蕉。

壽陽歌

壽陽樓前淮水碧。壽陽美女如脂白。李郎青鬢照青衫。曾在花前作狂客。伯勞睡重花枝晚。時許蜻蜓一

偷眼。歡娛雖少恨已多。纖手紅箋揮翠管。淮陽歸來春已暮。夜夜夢魂淮上去。欲歌舊曲只添愁。畫得雙蛾不能語。有客南來從壽春。衆中笑問動精神。自從柳別章臺後。攀折風光知幾人。已伴春衫辭側帽。不怕嬌啼隨意笑。嗟君耿耿獨相思。須信多情是年少。

勞歌

暑天三月元無雨。雲頭不合惟飛土。深堂無人午睡餘。欲動身先汗如雨。忽憐長街負重民。筋骸長毅十石弩。半柄遮背是生涯。以力受金飽兒女。人家牛馬繫高木。惟恐牛軀犯炎酷。天工作民良久艱。誰知不如牛馬福。

春雨謠

晚雲欲著樹。中夜一犁雨。老農呼子孫。力作莫辭苦。風吹潤土如炊香。烹雞爲黍餉南岡。我知聖人在明堂。元年已是豐年祥。

少年行三首

駢弓鵠角蒼雕羽。金錯旂竿畫貔虎。長驅直踏老上庭。手拔干將斬狂豎。歸來解甲見天子。金印懸腰封萬戶。自爲大漢上將軍。高揖羣公佐明主。人生豈合長貧賤。師事黃公會習戰。英雄天子伐匈奴。初拜將軍二十餘。黃塵晝飛羽如插。身射單于碎弓甲。從來書生輕武夫。坐遣揮毫寫勳業。

少年賣珠登主門。主家千金惜一身。綠鞵請罪見天子。尚得君王呼主人。鬪雞走馬長安道。豪傑驅來奉談笑。漢庭碌碌公與侯。畏禍憂誅先白頭。

古意

園中楊柳樹。飛舞似含羞。如何風靜處。盡放眼中愁。金鋪銀屈膝。動處有人挨。碁盤作十字。中心爲子來。橘犀如半月。何日是圓時。如何一種味。却有兩人知。

代贈

洞房飛香作春霧。仙人勸酒香中語。明眸第二紫雲娘。鸞學歌聲柳如舞。蹙眉長歌澧有蘭。銀鈎請君春草篇。繁絃高張燭燒夜。玉壺未盡參在天。春泥雪消淮上路。東風浪頭驚客艣。惱公舊事幾夢魂。過眼相逢一風雨。黃流清洛上天漢。吳山洞庭藏水府。謾題詩句寄歸舟。江口風狂那得渡。

代嘲

過作拋人去。非真我獨知。如何立不定。却有獨來時。

牧牛兒

牧牛兒。遠陂牧。遠陂牧牛芳草綠。兒怒掉鞭牛不觸。澗邊古柳南風清。麥深蔽日野田平。烏犍礪角逐春行。老犍臥嚙飢不鳴。犢兒跳梁沒草去。隔林應母時一聲。老翁念兒自攜餉。出門先上岡頭望。日斜風雨溼蓑衣。拍手唱歌尋伴歸。遠村放牧風日薄。近村牧牛泥水惡。珠璣燕趙兒不知。兒生但知牛背樂。



贈人三首次韻道卿

未必嬾蟻如素領。故應新月學蛾眉。引成密約因言笑。試得真情是別離。樽酒且傾寒琥珀。淚妝更看薄燕脂。北城月落烏啼後。便是孤舟腸斷時。

醉裏紛紛散別筵。醒來客枕一燈前。黃茅野岸三更月。春水長亭十里船。一點淚憑誰寄與。十年香在恨依然。空疑窗外梅花發。珠箔青樓若箇邊。

可是相逢意便深。爲郎巧笑不須金。門前一尺春風髻。窗外三更夜雨衾。別燕從教燈見淚。夜窗惟有月知心。東西芳草渾相似。欲望高城何處尋。

採蓮子

菡萏香蓮十頃陂。小姑貪戲採蓮池。晚來弄水船頭溼。更脫新裙裹鴨兒。

倚聲製曲二首有序

予自童時卽好作文字。每於他文。雖不能工。然猶能措詞。至於倚聲製曲。力欲爲之。不能出一語。傳稱裨諶謀於國則否。謀於野則獲。杜南陽以謂性質之蔽。夫詩曲類也。善爲詩不能製曲。豈謀野蔽耶。爲賦三首。

春絲惹恨鬢雲垂。媚態愁容半在眉。早是思深難語別。何堪肌瘦不勝衣。眼前有恨景尤速。門外無情車載脂。自笑不如天上月。尊前猶有見郎時。

不恨因緣不恨天。強持牙板向樽前。陽關一曲動山月。別淚千行盈酒船。薄命有情今已矣。傍人無意亦  
淒然。願君學取梁間燕。秋去春來到妾邊。  
山未高兮海不深。此情此意薄千金。今朝酒伴雙垂淚。明夜燈前獨擁衾。玉筋異時空見跡。塵犀千里亦  
通心。桃源路絕無人到。應許劉郎再訪尋。

劉壯與是是堂歌并序

子劉子構堂於官舍。名之曰是是。而求予爲詩。予復之曰。夫物生之所必有。而其爲物彼是相  
次而不能定。夫一者。天下之是非也。雖聖人出。無如之何。昔楚人有莊周者。多言而善辯。患夫  
彼是之無窮。而物論之不齊也。而託之於天籟。其言曰。吹萬不同。而使其自己也。周之爲此言。  
自以爲至矣。而周固自未離夫萬之一也。而曷足以爲是非之定哉。雖然。如周者。亦略稅駕矣。  
劉子乃構堂揭榜。而獨以是是非非自任。吾將見子吻敵氣殫。而言語之戰未已也。嘗試爲子  
歌堂中之樂。而息子之勞。庶幾隱几而嗒然者乎。歌曰。

讀堂中之書兮。以致子之眠。飲堂中之酒兮。以休子之言。是非雜然於子之耳兮。付庭中之歎蚓。與夫木  
上之鳴蟬。庶幾養生而保和兮。窮子之年。

獨處愁

高高花飛驚愁顏。珠簾晝鎖春風閒。少年金鞍照秦地。玉卮雙覆塵埃間。花間蝴蝶雙飛舞。感觸深心心

更苦。昨夜陰雲數尺許。連宵變作西窗雨。

### 遠別離

遠別離。明當入蜀去。酒酣日落客心驚。起與僕夫先議路。引車在庭牛在槽。桐枝嫋嫋秋風豪。別情惆悵氣不下。酒觴醜污麒麟袍。緩緩清歌慰幽獨。不惜更長更燒燭。贈君髮上古搔頭。莫易此心如此玉。平生每笑花飛片。東家吹落西家怨。但得歸時似別時。相知何必長相見。

### 行路難

人生動與衣食關。百年役役誰爲閒。四時睡足鞍馬上。去歲錢塘今長安。車愁羊腸夜險折。船畏人鮮晨驚湍。九州一身恨自惜。使我顏色常鮮歡。天地一氣成萬象。融卽是山結是山。再願洪爐鑪融結。萬世更無行路難。

### 白紵詞二首效鮑照

搖輕裙。曳長袖。爲楚舞。千萬壽。新詞白紵聲按舊。朔風捲地來崢嶸。燕雁避霜飢不鳴。高堂酒多華燈明。回纖腰。出素手。髻墮髮傾斂欲溜。爲君歌舞君飲酒。歲云暮矣七澤空。湯湯漢沔天北風。玉壺之酒樂未終。

### 七夕歌

人間一葉梧桐飄。摩收行秋回斗杓。神官召集役靈鵲。直渡銀河雲作橋。河東美人天帝子。機杼年年勞

玉指織成雲霧紫星衣。辛苦無歡容不理。帝憐獨居無與娛。河西嫁與牽牛夫。自從嫁得廢織紉。綠鬢雲鬢朝暮梳。貪歡不歸天帝怒。謫歸却理來時路。但令一歲一相見。七月七日橋邊渡。別長會少知奈何。却悔從來歡愛多。忽忽萬事說不盡。燭龍已駕隨羲和。河邊靈官催曉發。令嚴不管輕離別。空將淚作雨滂沱。淚痕有盡愁無歇。我言織女君莫歎。天地無窮會相見。猶勝姮娥不嫁人。夜夜孤眠廣寒殿。

琉璃瓶歌贈晁二

火維愁茫地軸傾。下有積水潛鯤鯨。鯨身翻瀾山爲崩。金鳥下喙搏龍騰。狂鬣奇鬣萬族朋。巨神日月雙手擎。夸娥愁思烏戢翎。老魚戰死風雨腥。長彗下掃千里驚。淺洲一席塊爲城。蠻兒夷女奇弁纓。大舶映天日。百程怒帆吼風戰。飛鵬舟中之人怪眉睛。獸肌鳥舌鬢翹撐。萬金明珠絡如繩。白衣夜明非縞繒。以有易無百貨傾。室中開橐光出楹。非石非玉色紺青。昆吾寶鐵雕春冰。表裏洞徹中虛明。宛然而深是爲瓶。補陀真人一銖衣。攀膝燕坐花雨飛。兜羅寶手親挈攜。楊枝取露救渴飢。海師跪請頽有胝。番禺寶市無光輝。流傳人間入吾手。包以百襲吳縣厚。擇人而歸。今子授爛然光輝子文章。清明無垢君肺腸。比君之德君勿忘。與君同升白玉堂。

九江千歲龜歌贈无咎

靈龜千年口不食。以背負牀飲其息。吾家兩龜豈徒不食亦不息。壽與萬古無終極。濟南晁君博物天地通。夜窺牛斗。頗似晉司空。指我兩龜有名字。大龜爲九江。小龜號千歲。老龍洞庭怒。蕩覆堯九州。原注。謂

半山老人禹咄嗟。水平流。原注：謂迂叟。九江無波拍天浮。中有大靈背如邱。南風吹楚澤。蓮葉清欲秀。有物中作巢。一寸立介冑。霞衣仙人鬢如霜。飲以南極之光芒。丹顏老客不相見。飛渡東海巢。案：巢一本作朝。扶桑邇來蟠桃枝。有子大如缶。浮游輕於鳥。案：此句一本作我身輕若蓬。江海一回首。青珊瑚柱碧搖宮。水仙焚香吹作風。朝戲蓮葉西。暮遊蓮花東。秋風蓮子熟。歸去清江國。小千歲。大九江。我久不見之。向君案前雙。我謂晁君二物有似我與子。國有守龜吾子是。燦然天下之寶器。黃金之騰紫瑤匱。天王端冕史再拜。一逆二從定大事。我身百無用。頗似千歲潛深淵。不願人間貯金藉玉享富貴。但願寄身江上一葉之秋遠。萬物才不才。用舍不任天。寄聲問晁君。然不然。

### 大雪歌

老農占田得吉卜。一夜北風雪漫屋。屋壓欲折君勿悲。隴頭新麥一尺泥。泥深麥牢風莫吹。明年作餅大如箕。野人食飽官事少。莫畏瑟縮寒侵肌。高堂晨興何所爲。門無馬跡人更稀。珠樓玉閣互飛動。坐見貧屋生光輝。無功及物慚受祿。豐穰幸賴天與之。棄糧遺粒待雞犬。吾羹何得長烹藜。

### 孫彥古畫風雨山水詩

山深巖高石壁白。佳日忽變天晦冥。黑風驅雲走不停。驚電疾雨來如傾。山前兩點大如手。山下水湧危槎橫。崩崖古樹老有靈。吼怒直與風雲爭。枝披葉偃鬪不怯。萬竅却欲藏雷霆。鞭驢疾驅者誰子。石足嶮澀驢凌兢。目迷心攝愈不及。來憩樹下如寒蠅。蒼芒直與鬼神接。恍惚不保龍蛇驚。平居此樂忽入眼。孫

家古圖纔可辨。奈何一幅一尺餘。欲奪天地之奇變。我心愛之良有以。昔苦山行親遇此。一生兩足不下堂。輸爾朱家貴公子。

歲暮歌

北風吹雪送暮冬。重雲如山爭塞空。百年老樹吼欲折。場翼不見南飛鴻。堂下幽姿亦可悅。點綴小樹花玲瓏。老人重裘不能煖。永夜惟守深爐紅。啾啾寒雀飛不起。飢啄凍土藏枯叢。青春欲回水官怒。摧拉未使陽和通。天時平分各司一。興廢誰得專其雄。杜門解轡聊有待。行看馬脚春泥融。

光山謠

蠟舟淮南望新息。天遣清淮限南北。崎嶇細路入光山。野色蒼涼秋日白。八月穫稻田無水。蚱蜢羣飛稻乾死。危橋絕澗聞水聲。喧喧汲水爭瓶罍。昏昏落日銜遠山。烏啼車轍未得閒。縣公吳生我世舊。爲我烹羊酤斗酒。燈前醉飽紛就眠。五更開門星滿天。長年他鄉心惘然。遠道辛勤難具言。

用劉夢得三題

春向晚。斜日在高樓。幽花愁脈脈。輕絮去悠悠。冉冉三更雨。蕭蕭通夜愁。春已暮。把酒送春歸。花落鳴禽散。草長遊客稀。去年堂上燕。故故傍人飛。春竟去。白髮感生平。流水去不斷。夕陽猶有情。舊時桃李月。悄悄向人明。

# 柯山集卷四

## 古樂府歌詞

### 年年歌

年年西風白露天。爛醉村釀秋池原。今年杜門不復出。爲愛我庭風日寬。東西相望兩叢竹。正色森森立青玉。朝烟暮雨恣陵奪。翠鳳文章終郁郁。苦榴新栽果不實。下有蕭條冒霜菊。人情雖欲薦我酒。物意豈願羸君菊。東欄黃葵色貴麗。氣壓滿欄香撲蔌。月桂淒涼何足數。蛛網挂蟲窘如束。安能卒歲不改芳。正自榮枯隨衆木。陶陶吾意力有在。瑣瑣眼前安足錄。朝來默坐有佳思。病去身輕如脫楮。從來北客望江南。何用登樓傷遠目。

### 鵝鴝詞

樹頭元衣郎。神爽聲復清。睡先萬目覺。起對殘月星。憫世耽睡昏。體穢神不靈。招使離衽席。啼呼每丁寧。幽人最憐汝。未旦起坐聽。荒山多嘉樹。春盡故園情。

### 圍棋歌戲江瞻道兼呈蔡祕校

蔡子圍棋非我敵。我謹事之如大國。主盟召會不敢辭。近忽憑陵有驕色。鄙人戰魯固非宜。於越入吳誰

可測。願君勿以大自驕。知小深謀戰。須克區區。江子似邾婁。我如強魯。端能役。凌兢螳臂。屢見拒。我但憐  
子心難得。近來措置尤小狎。何異穿窬。時有獲。可憐癡將不知兵。請視吾旂。豈冥北。饑魚貪餌。不知鈞口。  
雖暫美身遭食。雖然吾亦守疆場。防患猶須謹。蝨賊上攀蔡子。雖已遼。晉楚周旋。終有日。下觀江子行逾  
遠。我進駸駸。未知極。嗟予自謂敢忘謙。事有真誠難掩抑。爲君聊發一笑端。欲問吾某視斯檄。

周氏行

亭亭美人舟上立。周氏女兒年二十。少時嫁得刺船郎。郎身如墨妾如霜。嫁後妍媸誰復比。淚痕不及人  
前洗。天寒守舵雨中立。風順張帆夜深起。百般辛苦心不惜。妾意私悲鑑中色。不如江上兩鷺鷥。飛去飛  
來一雙白。長淮杳杳接天浮。八月搗衣南國秋。謾說鯉魚能託信。祇應明月見人愁。淮邊少年知妾名。船  
頭致酒邀妾傾。賊兒惡少謾調笑。妾意視爾鴻毛輕。白衫烏帽誰家子。妾一見之心欲死。人間會合亦偶  
然。灘下求船忽相值。郎情何似似春風。靄靄吹人心自融。河中逢單還成阻。潮到蓬山信不通。百里同船  
不同枕。妾夢郎時郎正寢。山頭月落郎起歸。沙邊潮滿妾船移。郎似飛鴻不可留。妾如斜日水東流。鴻飛  
水去兩不顧。千古萬古情悠悠。情悠悠兮何處問。倒瀉長淮洗難盡。只應化成淮上雲。往來供作淮邊恨。

啄木詞

紅錦長條當背垂。紫檀槽穩橫朱絲。美人亭亭面如雪。纖手當絃金桿撥。彈成了。丁啄木聲。春林蔽日春  
晝晴。徘徊深枝穿翠葉。玉啄勞時還暫歇。深園斷嶺人不知。中有槎枒風雨枝。蠹多蟲老飽可樂。山靜花



深終日啄。雄雌相求飛。且鳴高枝礪嘴。枝有聲。無功忍使飢腸飽。有意却教枯樹青。疾彈如歌細如語。曲欲終時情更駐。一聲穿樹忽驚飛。葉動枝搖不知處。

### 瓦器易石鼓文歌

周綱既季。宣王作提劍。揮呵天地廓。朝來吉日差我馬。夜視雲漢憂民瘼。桓桓方召執弓鉞。藹藹申韓賜圭爵。北驅獫狁走豺狼。南伐淮夷斬鯨鱷。明堂車馬走爭先。清廟笙鏞尸載樂。岐陽大獵紀功伐。石鼓巖巖萬夫鑿。千年兵火變朝市。後世紙筆傳冥漠。迹荒事遠貴者寡。歎惜風霜日摧剝。君誠嗜古更過我。易以瓦器尤奇卓。滿盤蒼玉列我前。制古形奇異雕琢。羲黃已亡巧僞起。采椽土木消純樸。何爲獲此上古器。經歷萬古遭搜掠。寥寥墨翟骨已朽。尙有遺風傳隱約。又疑晏子矯齊俗。陶土搏泥從險薄。或云古者宗廟器。斥棄金玉先誠確。是時此物參鼎俎。黃桴土鼓誠爲樂。嗚呼二物信奇絕。賴有吾徒與提握。不然烏瓦與荒碑。坐見塵埃就零落。

### 片雪歌

瑤池一片孤飛雪。風急身輕飛不歇。誰將翠袖遮得歸。十斛明珠換與誰。金龜貴客迎將去。玉作輜輶載塵霧。人間不解桃李心。獨與琵琶自相語。主人白頭情不親。朱樓夜鎖梨花春。願同花落寄流水。飄出朱門隨路塵。長恐此生空已矣。從此失身輕薄子。人生但樂兩知心。誰是瓊瑤孰泥滓。鶯鷺中彈花辭樹。蝶散蜂驚春日暮。風光不斷流水長。不知片雪今何處。

梁父吟

豪俊昔未遇。白日無光輝。隆中臥龍客。長嘯視羣兒。九州英雄爭著鞭。黃星午夜照中原。君看慷慨有心者。乃是山東高帝孫。老瞞抱壁控馬走。紫髯江左空回首。世上男兒能幾人。眼看袁呂真何有。永安受詔堪垂涕。手挈庸兒是天意。渭上空張復漢旂。蜀民已哭歸師至。堂堂八陣竟何爲。長安不見漢官儀。鄧艾老翁誇至計。譙周鼠子辨興衰。梁父吟。君聽取。擊節高歌爲君舞。躬耕貧賤志功名。功名入手亡中路。逢時兒女各稱雄。運去英雄非歷數。梁父吟。悲復悲。古今人事半如此。所以達士觀如遺。龐公可是無心者。何事鹿門招不歸。

度關山

度關山。意悠哉。秦關路險行車摧。秋雲沉沉天未曉。關吏正眠關未開。孟嘗逃秦畏秦逐。一日歸齊未爲速。重扉當道可奈何。搔首蒼茫空駐轂。主君無言客無計。仰看天星俯相視。風鳴木響心自驚。咄嗟謾養三千士。下客趨前敢獻誠。爲君試效晨雞鳴。引聲未絕羣雞應。軋軋重門俄徹局。馬嘶人語車輪轉。斗柄橫斜夜初半。奔風捷足欲何追。虎口脫身非素願。孟嘗好士竟何爲。纔得雞鳴狗盜兒。可憐當日慙勸意。輟食分衣竟爲誰。

天馬歌

風霆冥冥日月蔽。帝遣真龍下人世。降精神馬育天駒。足躡奔風動千里。蕭條寄產大宛城。我非爾乘徒

爾生小羌兒。漫羈絢。櫪上秋風時。一鳴萬里名。聞漢天子。內府鑄金求驃騎。將軍受詔玉關開。靈旂西指宛王死。天馬出城天駟驚。塞沙颯颯邊風生。執驅校尉再拜馭。護羌使者清途迎。麒麟殿下瞻天表。天質龍姿自相照。翠蕤黃屋兩邈迤。玉鐙金鞍相炫耀。東游封祀被和鸞。甲子比來巡朔邊。展才自覺逢時樂。致遠不知行路難。物生從類如有神。地無遠近終相親。君不見。莘野磻溪耕釣叟。一朝吐氣佐明君。

### 江南曲

平湖碧玉烟波闊。菱荷風起秋香發。採蓮女兒紅粉新。舟中笑語隔烟闌。高繫紅裙袖雙卷。不惜浮萍沾皓腕。爭先採得隱船篷。多少相欺互相問。吳兒蕩槳來何事。手指荷花示深意。郎指蓮房妾折絲。蓮不到頭絲不止。月上潮平四散歸。舟輕楫短去如飛。斷腸脈脈兩相語。寄情流水傳相思。

### 籠鷹詞

八月穫黍霜野空。蒼鷹羽齊初出籠。劍翎鈎爪目如電。利吻新淬龍泉鋒。少年臂爾平郊去。草動人呼躍寒兔。竦身下擊霹靂忙。毛逐奔風血濡距。爾能搏兔不能食。未飽中腸行復擊。主人厭兔爾尙飢。一生不快爲人役。蒿間黃雀鳴啾啾。飢啄野粟心無求。賦形雖小技能薄。不受羈縻得自由。

### 拳毛駒歌

北牕掃壁陳圖書。氣殺凜凜生坐隅。誰將尺素畫駿馬。云是文皇昔日拳毛駒。龍顏虎脊視天地。若滅若沒三萬里。皇天產此誰得之。蚪鬚十八眞天子。擒王滅寶如塵埃。英氣貫日天爲開。黃金甲光照天地。大

白羽箭馳風雷。原注。唐文皇與單雄信挑戰。雄信運鐵槩。文皇以大白羽箭射之。中其槩。出火數尺。雄信即遁去。真龍在殿。萬馬疾下。視四海皆驚駭。榛棘昭陵一坏土。柏城六馬莓苔古。嗚呼駿馬已埃塵。雖有燕昭難再親。

寒鴉詞

寒鴉來時九月天。黃梁蕭蕭人刈田。啼聲清哀晚紛紛。迭和羣音和且樂。朋飛聚噪動百千。頸腹如霜雙翅玄。風高日落田中至。部隊崩騰鉦鼓沸。高林古道榆柳郊。落葉晴霜荆棘地。志士朝聞感歲華。田家候爾知寒事。壠頭雪消牛挽犁。蕩漾春風吹爾歸。投寒避暖竟何事。長伴燕鴻南北飛。我滯窮城未知返。爲爾年年悲歲晚。扁舟東下會有期。明年見爾長淮岸。

寒食歌

東風芳草長。寒食春茫茫。人家掩門去。雞犬自相將。原頭簇簇柳與花。行人往來長歎嗟。舊墳新塚累累是。裂錢澆酒何人家。桑上鳴鳩喚山雨。雨脚蕭蕭山日暮。歸來門巷正春寒。花底殘紅落無數。北里悲啼夜未休。清絃脆管起南樓。古今歌笑何時盡。芳草白楊春復秋。去年巧笑鞦韆女。今年嫁作東家婦。綵繩畫柱似當年。只有朱顏不如故。百人學仙無一成。麻姑不見但聞名。真斛春醪須痛飲。江邊漁父笑人醒。

飛螢詞

碧梧含風夏夜清。林塘五月初飛螢。翠屏玉簾起涼思。一點秋心從此生。方池水深溪雨積。上下輝輝亂

凝碧幸因簾捲到華堂。不畏人驚照瑤席。漢宮千門連萬戶。夜夜熒煌暗中度。光流太液池上波。影落金盤月中露。銀闕蒼蒼玉漏遲。年年爲爾足愁思。長門怨妾不成寐。團扇美人還賦詩。避暑風廊人語笑。欄下撲來羅扇小。已投幽室自分明。更伴殘星碧天曉。君不見。連昌宮殿洛陽西。破瓦頽垣今古悲。荒榛腐草無人迹。只有秋來熠燿飛。

齊安行

黃州楚國分三戶。蔓蔓爲城當樓櫓。江邊市井數十家。城中平田無一步。土岡瘦竹青復黃。引水種稻官街旁。客棹朝集暮四散。夷言喞晰來湖湘。使君麗譙塗聖赭。門狹不能行兩馬。滿城鼙噪亂更聲。谷風穀穀黃鴉鳴。最愁三伏熱如飯。北客十人八九病。百年生死向中州。千金莫作齊客遊。

一百五歌

山民歲時事莽鹵。猶知拜掃一百五。平明士女出城闔。黃土岡前列尊俎。簞包粉餌蒸野蔬。富家烹羊貧薦魚。日暮肩輿踏風雨。江鄉人家無犢車。插花飲酒山邊市。醉後歌聲動鄰里。南人聞歌笑相尋。北人聞歌淚滿襟。

秋風謠

秋風起。秋雲高。連山草木如波濤。大江蕩瀟魚龍逃。羲和奔忙日車逸。八柱傾側恐不牢。柯山老人拚蓬茅。畏寒理我舊緇袍。粗餐在盤有濁醪。醉飽高臥從呼號。

東皋行

秋雲捲盡秋天清。東皋蕭條雞犬聲。黃葉吟風聲不平。芙蓉半落更有情。歸來僮飢羸馬疲。城頭樹暗烏欲栖。誰家朱樓人夜宿。微紅一點簾間燭。

正月詞

紅梢一夜櫻桃雨。簾捲曉晴鷓鴣語。簾旌細浪滾東風。迎得春歸與爲主。玉手嬌慵添繡線。欄下菖蒲近相見。雲屏曉睡翠翹橫。樓上寒時正五更。

二月詞

滾風晝幕長廊靜。簾下人眠初日永。嚶嚶不動採花蜂。夜來露重薔薇冷。芳草長時寒食天。紅牆低處見鞦韆。人家無事雞犬閒。日暮芳郊留醉眠。

飢鳥詞

北風夜雨鳥翅溼。低飛野畦啄遺粒。啄食不飽還畏人。嗚呼隔隴自求羣。我行陳宋經大澤。田荒生茅不種麥。空腸待飽明年禾。鴉鴉爾飢獨奈何。

苦寒行二首

淮南苦寒不可度。積雪連山風倒樹。長淮凍絕魚龍愁。哀鴻傍人飛不去。雪中寒日無暖光。六龍瑟縮不肯驥。老憶孤舟且復止。堅冰三尺厚於牆。

茫茫楚鄉仲冬月。白屋無烟飛走絕。空林號風冰斷枝。長淮無人冰照雪。凍埋釣艇不復漁。南羹未嚼淮中魚。要須下擘澄湫水。剗取寒蛟烹腹腴。

春詞

寶刀裁花碎羅縠。帶臘圓紅黃染粟。枝頭幾日卽花開。世上人情何太速。東風未轉北風嚴。返挂銅鈎不上簾。莫怪蛾眉呵素指。層簷冰碧玉纖纖。

宮詞效王建五首

夜來霜重著欄干。玉殿無塵玉甃寒。日日君王罷朝早。禁廷無事一冬閒。簾外微明燭下妝。殿門放鑰待君王。玉塔地冷羅鞋薄。衆裏偷身倚御牀。昨夜新霜滿玉階。初冬處處火爐開。中官逐院傳宣賜。南國諸侯進橘來。玉墀夜色晝昏昏。催放朝班散侍臣。隨駕上樓同看雪。萬重宮殿一時新。蓮燭千枝夜宴遲。君王索筆寫新詩。宮人和得爭先進。偏愛宋家兄弟詞。

早謠

七月不雨井水渾。孤城烈日風揚塵。楚天萬里無纖雲。早氣塞空日晝昏。土龍蜥蜴竟無神。田中水車聲相聞。努力踏車莫厭勤。但憂水勢傷禾根。道傍執送者何人。稻塍爭水殺厥鄰。五湖七澤水不貧。正賴老龍一屈伸。

貽潘邠老一有序

予居柯山西。潘邠老居東。九月十一日往過之。逕蔬圃。坐修誠堂竹間。歸飲於龜蟬之間。殊有佳興。作雜言貽之。

有屋可以讀書。有竹可以忘憂。採庭之菊。香有餘。烹園之蔬。甘且柔。賢哉二子。又復何求。鬼不爾責。人不爾仇。沽酒可飲。江魚可羞。又安用列鼎食珍。佩印封侯。我居柯西。相隔一里。可以杖履朝往而夕遊。必未厭我乞醯與借馬。但只恐勤君赤脚與露頭。不然將吾顏子簞食瓢飲。屢空之樂。又欲翻董生清明玉杯繁露之春秋。

醉中雜言

老人攀花復藉草。春力著人如醉倒。未容作計試留春。東風已與人俱老。東君惜春不惜花。千紅萬紫委泥沙。已教白日張錦繡。更欲平地興雲霞。我欲呼客無酒肉。摘花插頭悲髮禿。安得釀酒萬甕。屠千羊。花間醉飽踏春陽。



# 柯山集卷五

## 古樂府歌詞

### 龜山祭淮詞二首

迎神

木臯臯兮蒼山巔。回洑重深兮。其下九淵。東風歌兮春水舞。庭肅肅兮神來下。神來下兮翠帷舉。谷冥冥兮空山雨。雨三休兮神三燕。游雲高兮見極浦。安我舟楫兮君不怒。水濱之人兮苦思君。菖蒲生兮楊柳春。解君旂兮醉君御。樂一日兮莫予棄。

送神

楚巫醉兮君不留。春風起兮木蘭舟。弭余楫兮飲君酒。君既不顧兮。駕龍以出遊。凌九江兮勒滄海。萬龍舞兮百靈會。君孔樂兮我思君。望君故居兮。其上片雲。水淪淪兮石碌碌。空祠草長兮。風雨入君屋。山中春兮鳥鳴悲。明月皎皎兮中夜來。

惠別

洞簫奏兮瑤瑟御。日不足兮繼以夜。吾寧獨此湛樂兮。嘉予美之宜修。披浮雲出明月兮。揮衆星不與謀。

既成言以命予兮。顧永予之光明。豈獨謂不然兮。託東風以惠聲。嗟言獨何容易兮。有傾身者鬼神。中懷著而必見兮。卷蘭舌而交信。予雖不執子明燭兮。光輝其舍予。兩相審者不媒兮。予既獲子於鼻息。舒子聲以歌兮。鳳凰將聞而振羽。結子佩而起舞兮。星斗視子而上下。獨翩翩其不可留兮。君之居可知而不可得。春水渙渙兮。予獨飲君河之曲。鳥鳴羣飛兮。其下芳草。柳舒舒其可攬結兮。桃李始就其膏沐。行者懷兮。別者思。酌君酒兮。壽君以不衰。撫君舟之悠然兮。將浩渺以浮航。三江震澤兮。舟師告憊而一息。引日星之煌煌兮。吾獨望子於南極。想子其下兮。鼓聖濤而鞭蛟龍。使宓妃不敢巧笑兮。皇英斂衽而來從。南風之來兮。入予裾。悅余心。獨條暢而清婉兮。曰。是爲故人之風。

愬魃並序

壽安夏旱。麥且死。民憂之。無所不禱。雲旣興。輒有大風擊去之。間而雨。塵不辨人物。類有物爲之者。張子攷於詩。以爲旱之神曰魃。意者魃爲之乎。作愬魃詞。

帝治下土兮。遠於民。撫御萬方兮。周無垠。物類億千兮。莽藜藜。出入日月兮。運星辰。廣必有容兮。潛姦昏。不上愬兮。帝曷聞。歲庚申兮。斗建巳。旬逾十兮。雨不施。秀者燠兮。實者悴。麥莽兮。不出塊。舊穀旣沒兮。待新以食。奪其所望兮。民憂以惑。捨耒而兵兮。奪攘剽賊。急不知慮兮。求生頃刻。民幸帝兮。詔雲師。氣朝升兮。斂陽暉。執鼓風兮。震川岳。上者揚兮。旁者劓。雲雖仁兮。不得施。野童童兮。草木摧。執揚塵兮。蔽朝日。紛霏霏兮。冒萬物。昏迷蒙兮。浩恍惚。瞭者替兮。失南北。瘞根莖兮。腐葩實。世慘錯兮。澤蓬焯。霍霍然兮。侵

萬室飄雨塵兮。以且以夕。民曰誰爲兮。尸是有物。其名曰魃兮。旱是司。惡潤忌澤兮。盜陽威。淫視槁木兮。疾華滋。憎飽妬飢兮。幸民饑。亢不伏兮。風以助之。慘懷柔茂兮。塵埃是吹。來炎火兮。爛焯焯。馭回祿兮。騶畢方。朱旂燒兮。絳帷裳。坦無畏兮。樂洋洋。朋疫癘兮。友疾殃。徒甚劇兮。黨甚強。慢帝威兮。分害戕。竊祠禱兮。傲驅攘。民賴帝仁兮。以衣以食。上帝孔昭兮。愬無禍責。幸帝震怒兮。降魃罪疾。無俾在世兮。幽沉深溺。雷伐鼓兮。電揚旂。雨卷壑兮。雲張帷。泛游澤兮。湛甘滋。充槁瘠兮。奮枯萎。禾黍茂兮。蔬果肥。歲既登兮。民飽嬉。康帝民兮。恩甚思。幽斯魃兮。宥無期。

敘雨有序

福昌之民。有禱早於西山者。取山之泉。一勺祠之。不數日而雨。邑民言早歲取水以祠。輒應。且其取之者。非特福昌也。張子神之。作歌以揚之。

西山之泉兮。冽以清。瀉注萬古兮。無虧盈。應龍蟠守兮。謹防扃。有神司之兮。師羣靈。神君曷處兮。山之穹。雲郭霧闕兮。都蓬宮。騰駕逸景兮。馭清風。上友仙聖兮。佑帝躬。惟今之旱兮。非神曷愬。家無餘糧兮。麥不庇雨。土飄塵揚兮。迷行錯步。魃威孔張兮。熾莫予禦。挹水一勺兮。薦羔豚。曷求於水兮。神實憑。土有蔬兮。林有實。萋馨香兮。藟芳鬱。神我響兮。臨我堂。酌芝醕兮。御椒漿。巫甚祗兮。時甚良。哀我疾兮。降我祥。神君仁兮。念下民。撫民災兮。號帝聞。帝念神君兮。詔雨官。叱馭六龍兮。奮互飛。蹇掣飛電兮。鼓雷震。俾霑爾澤兮。正無限。山靈川怪兮。更騰奔。角毛羽鬣兮。爛鱗鱗。前幢後旆兮。玄雙輪。椎轟喧呵兮。翻乾坤。神龍九靈

兮雜蛟鯤。瞪眼飛涎兮。翻鰐鰂。伏潛羲和兮。止星辰。一洒萬里兮。傾河津。妖風失威兮。歛以奔。魃濡厥裳兮。伏以蹲。槁蘇焦澤兮。息悒焚。優渥潤沃兮。無涯垠。菽甦洗洗兮。奮裳紳。秋種既即兮。農則勤。既足而止兮。披霧昏。朝陽清明兮。歛游塵。功名不居兮。駕歸雲。空山寥寥兮。夜無聞。靈泉幽幽兮。湛滄淪。竭誠莫報兮。仁哉君。

友

張子官於福昌。塊然獨居。無與爲友。賓客不至。遺朋失舊。經時閉門。終日鉗口。出無與遊。居無與就。誰同我食。誰酌我酒。歸守妻孥。出對厮走。駕言出遊。田童野叟。氣否莫交。情包不剖。塞聰蔽明。盤足袖手。披書閱簡。眩目疲肘。厭然成痼。不可針灸。於是張子滌慮除煩。披庭掃堂。枕手而眠。恍若有遇。有神降焉。曰。我實哀汝。獨無友朋。我有教告。子乎我聽。凡世之人。百愚一賢。古昔所歎。非獨今然。得賢與朋。善固無僵。賢不可得。將愚與比。友賢實難。幸然後值。不幸友愚。與無執利。諂笑傾辟。韜情晦實。測心獻計。因隙投策。口是腹非。面歌背泣。友若此者。實繁孔多。曷若不見。目清耳和。我復告子。眞友之實。爾遵我言。友胡有竭。人物雖殊。可友同焉。賜爾以友。其名曰山。居汝左右。在汝北焉。端不汝去。澹兮絕言。春麗夏繁。秋疏冬瘦。霞霧融明。風馳雨驟。孤楫橫奔。牢屯巧鑿。傲岸軒昂。清華潤秀。對食臨眠。排堂入牖。効技汝前。雖勞不疚。山有佳泉。多灌爾圃。歷石懸空。冷洽清漱。如聞妙音。濯煩浴垢。不猶愈乎。卑議庸讀。過耳增慙。入心善煩者乎。山有修竹。汝園是植。靜麗明鮮。端虛正直。如彼正人。揚言發色。微風散碧。宵月鏤白。不猶愈乎。市兒塵

顏歌眉鼓吻。佞笑浮言。工爲媚悅。善佞曲拳者乎。山有喬木。聳立而峙。端無媚姿。若對正士。障雨蔽暘。千人所萃。微颺披拂。吹奏竽籟。不猶愈乎。蠕蠕鼠輩。女黠兒嬌。奴趨妾拜者乎。山有好鳥。清喉麗羽。引嘯長鳴。羣呼迭語。夜管風絃。哀簧怨柱。不猶愈乎。巷歌里舞。促縮跳梁。顛妖淫污。父子不施。棄禮忘數者乎。如前實繁。言胡可殫。汝與之樂。右攀左援。曷爲子子。寤寐嗟歎。張子再拜。受言永懷。解累亡憂。心通志開。高山巖巖。流水潺潺。竹茂木翹。鳥鳴琅然。如前夷齊而後。閔顏吾何爲乎。浩然其間。

種菊有序

張子病目眩而視昏。醫有勸食菊者。春夏食葉。秋冬食花。張子以爲菊華於草木變衰之際。而又功足以禦疾。類有德君子。因求而植諸庭焉。

何馨香之芬敷兮。昌綠葉而紫莖。是其名爲菊兮。爰植予之中庭。性清平而不躁兮。味甘爽而充烹。當秋露之慘淒兮。舒煌煌之華英。色正而麗兮。氣芬以清。純靜秀潔兮。族茂羣榮。採食以時兮。天和以寧。穎輕竅達兮。腫子清明。散敗流濁兮。風宣滯行。仙聖所餌兮。屏除臭腥。久嗜不廢兮。將延爾齡。嗟予生兮。蹇薄煩冥。憂飢畏寒兮。微祿以生。終曷歸兮。山林是營。膏粱鼎食兮。方丈縱橫。炙熊之蹠兮。龍醢羊羹。彼得有命兮。吾奚爾榮。惟茲佳菊兮。野食以生。採擷咀食兮。薦俎盈登。求之孔易兮。世焉莫爭。我有久疾兮。壅塞煩昏。支節堅痺兮。氣闕於元。憶不能支兮。外壅中乾。疥癬得志兮。蟻蚋伏蟪。餐華秋冬兮。食葉春夏。集新易故兮。爾功是假。寧康我軀兮。骨節堅良。產和剔戾兮。其樂洋洋。反華於玄兮。易瘳以強。忘生絕俗兮。深

瀟灑藏。騖駕雲霧兮。呼吸太陽。招友彭咸兮。御風以翔。吁嗟此菊兮。吾於爾望。

逐蛇有序

福昌官居北負山爲堂。有大蛇穴堂北。時下飲堂南水中。人皆以爲神。見者不敢逐。或禱祠焉。張子曰。是吾居也。蛇安得而處之。且蛇爾安有所謂神者。作此逐之。

嗟堯之時兮。大水滂橫。潰四海兮。包陵岡。蕩流湧汨兮。周無傍。龍騰蛇奔兮。嬉以狂。腥鱗頑蠹兮。更披猖。城居穴處兮。亂厥常。頽蟲糾結兮。肆害戕。陸盤淵據兮。傲不臧。朋屯黨集兮。蕃以昌。穿穴噬嚙兮。民盡傷。下民旣病兮。帝弗康。黃熊幽殛兮。羽山陽。乃命伯禹兮。行四方。乘高趨卑兮。陵復航。鑿山流源兮。導河江。萬水下走兮。來洋洋。經畫九野兮。興農桑。驅龍放蛇兮。屏諸荒。焚山燎野兮。無遺芒。野巢窟居兮。保厥疆。敢有弗率兮。斷爾吭。伯益作志兮。稽妖祥。帝虞耄勤兮。黜子商。天授神禹兮。夏是王。九牧作貢兮。金鑑鏗。大冶鼓鑄兮。騰精鏗。巖巖九鼎兮。峙且剛。奇形詭質兮。走與翔。鱗毛羽倮兮。雜短長。求情抉態兮。幽微彰。制馭百怪兮。嚴紀綱。獸蟲人鬼兮。安其鄉。殊宮別域兮。異存亡。曷爲茲蛇兮。宅我居。妖頑堅老兮。傲驅除。深潛居此兮。坦無虞。下飲我沼兮。稍林株。朱眸丹舌兮。玄鱗膚。恍惚遽速兮。疑有無。居者畏避兮。行者徐。險奪我圃兮。駭我徒。盜竊祭禱兮。欺羣愚。我咨爾蛇兮。潛山而穴野。陰蟠遠伏兮。與人乎異舍。冬居夏游兮。時以行。食爾之食兮。朋爾朋。僭亂我居兮。常失經。叛棄爾守兮。帝有刑。胡昏與頑兮。居以甯。自爲不甯兮。邀割烹。荒戾天理兮。悖聖程。我宥爾愆兮。逐爾行。亟舍故處兮。無以征。南山之幽兮。雲霧冥。萬本蒼蔚

兮嶮不平。爾徒實繁兮。食惟爾盈。捕取不至兮。居無與爭。汝生孔遂兮。壽縣爾齡。物違其常兮。禍之所集。豐狐晝游兮。冬裘以白。龜厭淵處兮。吉凶是卜。虎不畏人兮。皮包戈戟。矜險恃孽兮。其終鮮克。我言孔昭兮。語汝以理。日吉時良兮。汝盪以逝。

登高

懷不展兮居無聊。默諄語兮浩長謠。寫我心兮登彼高。陟萬仞兮捫九霄。命清風兮披浮雲。瞰四荒兮視天垠。大海蕩滌兮潛龍鯤。吐吞日月兮制明昏。醞釀元氣兮函星辰。羽載四海兮芥浮坤。四岳列峙兮嵩中蹲。牽連脈絡兮子復孫。草蔓木布兮升降如朋。障南蔽北兮東散西分。如掌列塊兮盤羅豆罇。黃流中貫兮發源崑崙。東驚大海兮縈如繚紳。南方炎炎兮火之所宅。朱鳥屹峙兮丹膺絳翮。鸞飛以翔兮輝煌爛赫。從擁萬羽兮紛羅羽翼。煌煌尊嚴兮有斗在北。升降玉都兮運量帝側。呼吸陰陽兮秉持禍福。真仙逍遙兮澹不可挹。西有王母兮戴勝穴居。壽歷萬古兮忘終泯初。超遼恍惚兮獨與道俱。驂友日月兮羣靈走趨。既又左而東顧兮。觀大明之始生。震沸九淵兮麗天升精。披攘羣陰兮重幽昭明。有神司馭兮朱裳絳纓。呼造物以致問兮。吾將放乎太初。彼天地其孰始兮。日與月其代除。四荒漫其何極兮。人胡爲而中居。火何爲而南宅兮。水孰使其在北。安知東之主生兮。西配刑而主殺。斗建寅而氣分兮。疇爲四時之消息。世徒知其已然兮。遂推類而立說。彼厥初其孰造兮。孰布施而殊別。抑其不得不然兮。或者私智之所設。將忽然而自爾兮。遂已成而不可絕。造物爲余究察兮。曰此曷可以言陳而意悉。彼混沌之一氣兮。

吾不知誰合而爲一。忽洞達而兩分兮。夫亦安知其誰關。爰升清而降濁兮。水赴陰而火陽。東升氣而敷生兮。西成而害戕。強名之曰自然兮。曷足以究其必至。謂不得不然者。愈疏兮。尙安取於私智。莊周誕而妄推兮。夏革愚而臆對。世號予曰造物兮。予亦曷有所主。尸苟待予而後造兮。彼造予者。復誰姑置之而勿校兮。任萬物之自成。游小智於太初兮。何異夏蟲之語冰。曠任之而勿疑兮。萬里會而一平。夫何造物者。開予兮。神飄飄而不居。我將赴而遠遊兮。招神聖以爲徒。騰九螭之奔輪兮。追飛電而攬奔風。周萬里於一息兮。堂西極而有九區。叩玉闕之九關兮。覲上帝於絳都。酌瑤尊之芳酒兮。招赤松而友彭祖。既錫我以難老兮。黜嗜慾而襲靈虛。爰侑我以祕藥兮。合千籥而吹萬竽。樂吾心之洋洋兮。舒五體之與與。降復還於我室兮。聊彌日而一娛。

子由先生示東坡公所和陶靖節歸去來詞及侍郎先生之作。命之同賦。未輒自憫其仕之不偶。又以弔東坡先生之亡。終有以自廣也。

歸去來兮。行世不偶。予曷歸。其出無所爲喜兮。舍去而何悲。眄一世之無與兮。古之人逝莫追。求不疚於予義兮。又奚恤餘子之是非。彼好惡之罔極兮。或顛倒其裳衣。顧吾涉之已深兮。愧哲人之見微。吾歸甚安。無所事奔。旣守吾室。又杜吾門。一氣孔神於中夜存。納至和於靈根兮。揭天醞於元尊。旣充溢於幽闕兮。亦粹然而見顏。往有坎而茲夷兮。昔或危而今安。將從化人於西域兮。面藏吏於函關。將以一世爲芻狗兮。廢與與吾厭觀。彼福禍之一源兮。必茲出而茲還。彼自以爲無隙兮。何異夫石槨之宋桓。歸去來兮。




吾悲夫斯人不返兮。豈招仙聖與之游。昔惠我以好音。忽遠去而莫求。予曷異於世人兮。初爲哽塞而增憂。彼錢鏐則深藏兮。盍視夫已墾之田疇。萬古芸芸共逝一舟。半夜而失。且號其邱。畏達觀之謂予。涕已泣而不流。悟榮名之取憎兮。善斯人之獲休。已矣乎。萬物之作各其時。吾獨與時而去留。豈或能力而達之。既往莫或追。來者尙可期。蓋雨暎之在天。豈吾稼之不籽。彼蜀雄之必傳。作猶愧於書詩。嗟身屈而道伸。於斯人兮曷疑。

哭下殤

下殤者何。吾兒也。兒生慧淑。父母有所戒。輒絕不爲。性仁不傷物。處其曹。恂恂也。年七歲。得驚疾。醫之不得其方而死。作此以哭之。

醫之不得其方耶。抑其命有短長耶。獨爾能使吾悲若此耶。抑爲父者皆愛其子耶。蒼顏夷顙。秀眉清目。今其存亡。其猶有鬼也。使無物。則吾復何思。其尙有知也。則夫荒屋野寺。風霜雨露。食息誰汝視也。



# 柯山集卷六

## 五言古詩

休日同宋遐叔詣法雲遇李公擇黃魯直公擇烹賜茗出高麗盤龍墨魯直出近作數詩皆奇絕  
坐中懷无咎有作呈魯直遐叔

沐日不造請出遊賢友同城南上人者宴坐花雨中金猊散香霧寶鐸韻天風鳥語演寶相飯香悟真空  
尙書三二客淨社繼雷宗黃子發錦囊句有造物功握中一寸煤海外千年松誰降午睡魔賜茗屠團龍  
鬼子臥城西咫尺不可逢豈無坐中客終覺少此公歸帽見新月撲衫暮塵紅困眠有餘想卻聽寺樓鐘  
掛虎圖於寢壁示枯衲

畫工出幻事縞素發原藪蕭蕭白茅低凜凜北風走眈然老於菟舉走安不驟目光炯雙射怒吻呀欲受  
彼彪擲其旁文彩淡初就雖然竊形似已足走百獸煩有衛吾寢振此蓬華陋坐令盜肉鼠不敢窺白晝  
神運殿望香爐天池等峰晚宿官廳明旦早發

遠公不出山坐受天龍供地祇敢愛寶木石親輸送巖巖千年屋山立屹不動風雲宿修梁星斗近華棟  
亭亭碧香爐薜蘿時自涌五雲嚴擁衛天樂下鸞鳳神池闕寶像光怪發巖洞誰能陟其巔手攬湖龍鞚

東堂黃金藏。龍像儼環拱。蕭條亡國輦。拙樸昔誰用。掃堂爲一睡。清極乃無夢。思歸成晨發。結束勤僕從。鴻鐘振林莽。月落朝嵐重。再往墮渺茫。猿鶴應嘲諷。

贈張公賁

我昔爲諸生。奉書諫議公。後來辱稱獎。禮數賓客同。決科甫弱冠。年少氣如虹。歸來陪後乘。不責醉後恭。孤舟梁宋郊。旅態萃百窮。拜公睢陽府。笑語若春風。人事不可期。俯仰異吉凶。平生丹竈術。馬鬣哭新封。十年得吾弟。懷舊涕沾胸。清貧守家法。眉宇肖德容。交臂是非外。爲僚兄弟中。東軒語長夏。葵竹羅青紅。西舍雪夜懽。玉顏醉瑤鍾。欲飲徑相就。三更叱閭翁。鯨吸絕遺滴。山頽信傾峯。搜抉盡醬茹。植梨倒筐籠。通宵兩沈醉。午起頭如蓬。人生定當爾。事去挽驚鴻。河梁繫君馬。一笑喜相逢。憐君碧紗幌。夜淚哭葦叢。我方困蠶鹽。酸寒官辟誰。同尋舊游地。塵壁冒絲蟲。啼鳥古寺間。夏陰小園空。酒市逢好好。琵琶失瓊璫。歌舞一分散。賓僚亦西東。忘情猶一歎。齊物論非通。官冷隱朝市。端能信予慵。人生當富貴。子盍自磨礱。便當隱五車。一一貯心胸。功就螳作埽。叢成蛇化龍。北郊分袂歸。作惡驚兒童。長謠代晤語。發子一笑哄。

離黃州

扁舟發孤城。揮手謝送者。山回地勢卷。天豁江面瀉。中流望赤壁。石腳插水下。昏昏烟霧嶺。歷歷漁樵舍。居夷實三載。隣里通假借。別之豈無情。老淚爲一洒。篙工起鳴鼓。輕艣健於馬。聊爲過江宿。寂寂樊山夜。

黃州望樊山。秀色如可攬。扁舟橫江來。山腳繫吾纜。大川失洶涌。淺水澄可鑒。北風吹疏雨。夜枕舟屢撼。齊安不可望。滅沒孤城暗。奔流略溪口。龍蜃屢窺瞰。平生千金質。戒懼敢忘暫。茲遊定何名。耿耿有餘念。

道士磯

匡廬奠九江。苗裔遍南服。橫江蔽原野。內外實一族。危磯插江生。石色擘青玉。蛟龍穴亂石。獠獍在喬木。我行季冬月。江蹟在山腹。扁舟如鏡面。清淨不可觸。躋攀既不可。千古長幽獨。緬想邃古初。巢居戒樵牧。

離樊口宿巴河遊馬祈寺

扁舟下樊溪。江南正清瀉。曉登巴河岸。極目望春野。步尋修竹寺。古木爭偃亞。云昔孫仲謀。刑牲致師禱。雄圖邈已矣。英概足悲咤。石梯造雲霧。丹白開廣廈。山僧安寂寞。畏冷不出舍。勞生遇閒境。頓使我心寫。晚江平若席。風勢欲相借。

龜陵灣阻風三日遙禱孤山而風止

積水多疾風。三日阻我舟。天寒波濤惡。岸窟騰龍蚪。五更船篷鳴。冷風入衾裯。平明諸山雪。爛漫鋪琳球。篙工笑相顧。拍拍我船頭。水魄小孤神。霧鬢橫星眸。倉卒禱即應。知我厭滯留。稍晴景物好。柳色含新柔。春風我故舊。迎我入東州。

自離富池凡三禱順濟龍求便風皆獲應又風日清霽舟行安穩委曲如所欲感而成詩

旗尾指船頭。篙工告風便。張帆弛雙鱗。去勢如脫箭。船傍兩高山。過目若流電。波平船穩駛。客寢兀未變。

吾聞西江龍。神力回寓縣。往來萬夫禱。正直乃獲願。嗟予何所恃。誠確無所薦。神豈哀我窮。有賜不待獻。乃知人窮。本不坐神譴。人間事若異。未易以言辯。坐令千里遠。近若在几研。慚非謝宣城。擢筆賦淨練。出山

青山如君子。悅我非妾媚。相逢一開顏。便有論交意。今晨決然去。摻若執我袂。謂山無見留。此事寧久置。道邊青髮翁。下有白玉髓。斷之龍蛇窟。自足飽吾世。平生耽幽獨。乃若忘朝市。一官等塵垢。安得敗成計。草堂醉老子。虎溪大開土。寄語二主人。爲留三畝地。

朝雨

幽居感節物。僧舍值朝涼。空簷落寒雨。滴滴響秋堂。低飛林間翮。溼羽不能翔。危葉別故枝。幽花泣晚芳。悠悠清夜眠。促織催朝光。日月愴已徂。吾行獨迷方。采采幽圃蘭。歲晚自馨香。君子健明德。勿爲兒女傷。

離陽翟

驅車發潁川。回望失嵩少。霜氣塞層空。黯澹寒日曉。原田際天平。百里見飛鳥。累累道傍邱。石獸臥衰草。不知誰氏碑。剝裂偶未倒。支離見隸字。書帶漢筆妙。遺墳不可問。文彩竟何效。永年恃金石。此計久可笑。昔遊已三歲。存歿傷懷抱。飽諳人世憂。安得身不老。

次潁川

許昌古名都。氣象良未替。客子遠道來。塵埃滿襟袂。黃昏造孤驛。買飲嚙枯葢。庭寬蟾蜍高。霜氣徹寒被。

賴攜朱提杯。可具一飲費。無人勸我酌。孤獨伴客醉。笙簫誰家樓。語笑月中市。何人不行樂。而我獨涕淚。夜長更漏稀。風急鼓聲駛。天明卷席去。行止隨所值。

昭陵六馬唐文皇戰馬也。琢石象之。立昭陵前。客持石本示予。爲賦此。

天將剗隋亂。帝逢六龍來。森然風雲姿。颯爽毛骨開。飄馳不及視。山立儼莫回。長鳴馳八表。擾擾萬駑駘。秦王龍鳳姿。魚鳥不足摧。腰間大白羽。中物如風雷。區區數豎子。縛取如提孩。手持掃天帚。六合無塵埃。艱難濟大業。一一非常材。惟時六驥足。續與英衛陪。功成鏘八鸞。玉輅行天街。荒涼昭陵闕。古石埋蒼苔。

同楊十二緱氏寺宿草酌張正民秀才見訪

契闊千里別。惻愴難具言。殷勤一宵語。願子未卽眠。空堂燈火青。旅榻借僧氈。勞勞一盃酒。不解道路寒。經年相從樂。旣別亦茫然。人間事盡爾。聚散亦何歎。但悲多難身。尙獲朋友歡。聞關百憂中。一笑有萬錢。張子年未冠。已雄羣少年。嶮嶮坐我側。紫眸秀雙顴。壯志激哀懦。清談破愁煎。天明卽分散。奈此情悵悵。

初到都下供職寄黃九

千里不相見。勞勞復何辭。不遠一城中。耿耿令我思。儻舍酒家樓。推壚卷其旗。鼠壤敗晨炊。守翁噪羣兒。馬傍挾兩羸。雙踵待刻移。五日長安塵。故山夢中歸。何以洗我心。望君青松姿。懷情久不吐。古屋絃悲詩。

次韻魯直夏日齋中

文章慙骯髒。談舌罷雋永。年來屏百事。但願兩耳靜。黃公安禪室。不覺在市井。客來飽清風。可是徒造請。

機尊與社樗。妄計幸不幸。願君妙觀察。金門等雲嶺。

晚歸寄无咎二首

雨氣入古屋。薄帷生夜清。想君擁鼻坐。端學苦冷生。泥深欺我馬。歸臥日半楹。浩然有奇想。非子定誰評。屋東雲移山。屋西日半壁。餘天一劍清。遠雨萬絲白。官事癡可了。未遭官長責。惟應晁夫子。不可別頃刻。

送呂際秀才南歸

咽咽幽谷泉。蕭蕭秋竹風。豈不愛孤潔。但傷愁且窮。呂子南國秀。滄溟貯其胸。出試輒不偶。低頭避兒童。離家五千里。客飯苦不豐。冷落臥寒齋。苦吟和秋蟲。作者投我詩。九嘆閱未終。欲知作者心。但視讀者容。文章出貧賤。此事古今同。但願子富貴。不願文日工。今日告我別。出門若鷺鴻。各在天一方。何當復相逢。

西山寒溪

茲行頗閒暇。聊此山水間。幸有所攜人。臭味同一源。杉松鳴古刹。始覺此溪寒。孤亭出屋背。石磴相牽攀。釋子且粗糲。雖貧有餘歡。午登西山去。路作九曲彎。山禽慣不驚。夏木秀且繁。緬懷紫髯公。奠玉祠天壇。豪強有遺韻。興廢無留觀。空崑一泓泉。引予掬清甘。案此二句一本作眼明西問泉。引手掬清甘。至人悲熱惱。遺此消昏煩。我茶非世間。天上蒼月團。爲爾惜不得。烹瀹澆晨餐。深谷晚易陰。快雨時斑斑。但見夾道松。龍髯溼蒼顏。念我亦閒人。屏居閉柴關。不使倒珠玉。濟我胸中慳。之官亦漫浪。遇勝卻盤桓。平生據頑鈍。信命傲憂患。言歸徒旅疲。就蔭休征鞍。卻視來時舟。一葉繫荒灣。



送張天覺使河東席上分題得將字

張侯蜀都秀，玉立身堂堂。手持明光節，六月登太行。三晉雄中夏，朔方臨大荒。傳聲賢使者，父老相扶將。控弦百萬戶，十年廢耕桑。但使把鋤犁，自然息桁楊。主人延閣老，別酒泛蘭觴。寄聲梁諫議，欲試紫參方。  
原注：梁欲寄上黨參，久未至也。

答仲車

先生居山陽，時事不挂齒。讀書逾五車，不肯著一字。今朝苦歎嗟，告我將老矣。我意與子殊，欲去依禪子。  
和仲車元夜戲述

華燈耀廣陌，皎月臨重城。惟我二三子，柴門通夜扃。展書對明燭，濁酒徐徐傾。崢嶸千萬慮，一醉皆能平。  
和魯直

濟物非僕僕，功名愧無心。倚市安能美，汲泉不厭深。老人夙有尚，瓶鉢好叢林。安能紅塵裏，徒使老駸駸。  
書館直舍

紫禁斷人聲，蓬山轉春日。樓外晚鼓傳，城陰衛番出。循除攝新秀，紅紫間疎密。倚天黃金闕，龍虎氣鬱律。明時賦鉛槧，寓直守編帙。疎閒謝神補，歲月感飄忽。謝公山林賞，不爲軒冕屈。體道無朝野，達情慙利物。  
宣城至日謁天慶觀行香呈郡僚

溪山慘殘歲，況乃值深冬。清晨率其屬，肆禮凝琳宮。漠漠冒原霧，淒淒隔水風。南方異氣候，霜葉未全紅。

忽憶簪史筆。早趨闕蒼龍。拜舞東閣上。佳氣鬱葱葱。談笑出右掖。交游盡英雄。老大心已矣。依然魂夢中。

秋日獨酌懷榮子邕

新秋一盃酒。風雨早涼天。眷言西隣友。咫尺莫能前。豈無病羸馬。泥滑不勝鞭。端居何爲者。落莫掩書眠。高柳颯已疎。碧草留餘鮮。衰懷感徂節。客舍悲流年。孤吟誰與和。獨酌還醒然。新晴野路乾。期子南山邊。

初涼

庭木舞風雨。清秋來我堂。衾裯偃宵寐。燈火照新涼。昔我來清潁。庭花有晚芳。坐看桐葉暗。已近菊枝黃。歲月忽流駛。形骸變老蒼。淹留應有命。通塞詎能量。寂歷年華晚。優游永日長。憂時非我事。黃卷有虞唐。

題陸羽祠堂兼寄李援援有詩殊佳二首

陸子不可招。寂寥風月魂。空堂掩遺像。幸此配老禪。舉世人澆薄。云誰知子賢。竟陵樵牧地。陳迹豈復存。我欲歌子詩。三歎撫無絃。瓦登薦秋菊。酌此石井泉。清詩弔陸子。味若堂下泉。陸子骨已朽。青松代之言。松亦安能言。風至時蕭然。至談非牙舌。陸子意已傳。

萬松亭有感

微雨濕青松。松間多好風。翠光濃欲滴。對舞千蛟龍。可惜青玉斂。道邊委蒿蓬。幽人不汝棄。應有綠毛翁。

今日

今日寒氣至。晨坐進一杯。一杯未能已。三酌竟空罍。我有胸臆事。欲言誰使陪。往往中夜歎。鬱結無由開。

賴此樽中君。破悶有後來。時時從之遊。報我以歡怡。故園多寒看。老妻治炮煨。誰云一日富。此價萬瓊瑰。

摘梅花數枝插小瓶中。輒數日不謝。吟玩不足形爲小詩。

疎梅插書瓶。潔白滋媚好。微香悠然起。鼻觀默自了。秀色定可憐。仙姿寧解老。禪翁心土木。對此成魔惱。

霜後步西園

濃霜失暄妍。短日淡無色。回風振中園。搖落聲策策。草根飢鳥啄。飛舞時噴噴。野荒無遺粒。卒歲將何食。鮮鮮西牆下。幽草弄寒碧。四時不吾欺。聊假汝頃刻。

冬懷三首

悲笳奏已罷。落月在西壁。臥聞中林鳥。先曉鳴噴噴。爾求亦易供。固合事安息。夜歸陵旦起。何爾更勞役。乾坤擾萬物。不使輕有獲。無求良獨難。何以休吾力。揚雄老不遇。寂寞玩文史。廁身虎狼間。乃卒脫其死。中恬遺外慕。獨樂異衆喜。但有載酒人。何用求知已。年來百事懶。惟樂靜中趣。天寒無來客。終日常閉戶。進取乏時才。窮通有天數。委身付造物。已矣隨所遇。

感春三首

東風吹桃李。花落已滿地。搖搖新柳枝。薄蔭纔可庇。誰云同一時。榮謝兩異意。由來何足較。要之歸一致。默坐不復出。浮雲作朝陰。離離簷間花。隨雨下故林。物色一如此。朱顏坐凋侵。自歌陽春曲。吾不待知音。午日步西園。繁花亂相照。天天海棠枝。顧我如欲笑。殷紅點輕素。含吐皆窈窕。持贈東鄰子。願言論久要。

春日雜詩六首

啼鳥喚我覺。簷日行且午。疊疊出葉鶯。庭雀鳴欲乳。妻兒病酒睡。雞犬樂其侶。風光不我違。舍醉何有度。東風入我園。花落如急霰。感之復攜酒。撫樹爲三歎。離離牆間草。滿地不可踐。陰陽本無情。榮謝欲誰怨。春晏百花秀。野花無復名。悲哉桃李闌。念此聊掇英。翩翩雙飛蝶。天靜午日晴。悲憂浪自若。有酒但知傾。堂南老榆柳。清陰漸交映。飄飄風花乾。渥渥雨葉盛。鳥鳴日方遲。客去門逾靜。自無濟世略。耿耿欲誰省。三月行復至。青春坐侵尋。飛花去寂寂。新葉來駸駸。白日照芳草。荒園亂鳴禽。朱顏任自老。安事累吾心。東風忽無情。吹我園中花。繁紅與豔紫。零落委泥沙。鳴鳥亦何事。啾啾竟誰譁。須知盛已極。委棄欲誰嗟。

官閒

官閒吏歸早。歲晏寒欲盛。槐稀庭日多。鳥下人語靜。幽花破寒色。過雁驚秋聽。酒賤莫厭沽。北風行欲勁。

秋池

平生落寞意。況此秋池側。寒水靜無波。衰荷委餘碧。蕭蕭動風鬢。照影感新白。來往雙浴鳧。爾生真自得。

雜咏三首

隆中臥龍公。平昔事耕釣。無言顧同儕。高視獨長嘯。彼寧惜開口。顧爾非同調。何事逢玄德。曹孫一言料。六槐當我庭。春葉密如幄。朝來南風起。已見萎葉落。盛衰同時來。豈必待蕭索。鄙哉兒女癡。情情情所樂。鳥鳴高屋上。飢顧朝求食。擾擾市井人。日夜衣食迫。豈伊理當然。或者養未得。我歌南風詩。歸坐還歎息。

飛雲

時雨久不施。飛雲作朝陰。芄芃中原麥。賴此三日霖。朝陽忽清霽。披露南山岑。雖無濟物跡。膏澤在民心。

和應之燈蛾

萬物皆畏死。爾生何獨愚。由來附炎熱。鮮不喪其軀。淺淺權利客。躑躑輕薄夫。高門甚烈火。相勸以奔趨。

自黃州至巴河遊靈巖寺觀孫仲謀刑馬壇相傳權於此刑馬祀江神遂提師伐壽春云

喬木隔塵埃。華堂敞深僻。人靜好鳥鳴。睡餘疎雨滴。悲愁感蕭瑟。弔古披荒寂。尙溯紫髯翁。誓師沈馬壁。

雜詩

獨居無與往。況此陰雨天。起來復何有。詩書散我前。偃臥一榻上。讀書疲復眠。經綸負夙志。跌蕩窮吾年。

搗藥

指可握而足。臂可攘無他。何爲勤藥物。杵臼日諠譁。指臂何與人。正欲使其佳。念此慙吝生。達人其我嗟。

烏臼

烏臼強知曉。譏譏鳴暗天。我事不須早。援衾且復眠。朝暉方曠曠。慘凜蔽清妍。且復待午景。負此簷間暄。

春林

春林露如雨。蕭蕭曉花寒。引手攀高紅。微香來鼻端。何比芳潔。置之青玉盤。持歸供像佛。相對淡無言。

華月

華月流春宵。散我高林影。披衣步其下。受此掃地靜。吾心方浩然。萬境一澄瑩。徒倚玉繩低。寂寥沈遠聽。

離楚夜泊高麗館寄楊克一甥四首

去城未五里。夜纜繫衰柳。水亭暗風雨。人散聞吠狗。平生足羈旅。況此還往久。有感不自知。悽然獨回首。  
水天夕雲重。不雨衣自溼。夜寒更夫語。雞唱舟子急。青黃數宿莽。蒼茫暗原隰。高城亦何有。倚檣成獨立。  
客去水關閉。疎燈亦復收。川平半夜雨。臥冷五更秋。扁舟已寒暑。冉冉真乘桴。一燈照客睡。短夢良悠悠。  
士師我自出。爽邁凌清秋。年少不飲酒。昏燈夜問囚。爾家外大父。聽獄代其憂。備飢朝煮飯。驅蚊夜張幃。  
獄成上府時。稽顙呼張侯。原注：先子治獄卹囚最有恩。事載墓刻。恕心臨繯紲。相盜以戈矛。無令市死厲。  
請帝號重幽。

# 柯山集卷七

## 五言古詩

### 三月小園花已謝獨芍藥盛開

靄靄春日晚。寂寂新陰繁。千紅與萬紫。盛極一時闌。西堂晚芍藥。百尊乘露鮮。紅粧諸美人。錦繡富春妍。東風時過之。舞態低昂翻。折贈懷淒洎。感之爲三歎。

### 題焦山

焦山如伏龜。萬古浸碧浪。舉頭北顧海。尾負金剌壯。我聞城東樓。秀色日相向。松杉數毛髮。人物見下上。欲攜浮丘公。據殼恣潛漾。仙風如見引。金闕或可訪。

### 春日雜興四首

桃李用事辰。鮮明奪雲綺。繁華一朝去。默默慚杞梓。時徂鷹化鳩。地遷橘爲枳。獨有羨門生。後天猶不死。昔我遊京室。交通五陵閒。主客各英妙。袍馬相追攀。千金具飲啜。百金顧吹彈。纓弁羅廣席。當頭舞交竿。鮮妝耀淥酒。錦纈生風瀾。燈燭暗夜艾。士女紛相班。歡娛易徂歇。轉盼如飛翰。臺臺負孤願。離離銜永歎。山鳥窺茗飲。簷花笑蔬餐。棄捐勿重陳。事定須蓋棺。

客從遠方來。遣我昭華管。吹之幻人心。異境生虛竅。礲礲青幃橫。決決春流滿。馬蹄交狹斜。車轂錯平坦。士女競芳辰。禽魚蔭修筍。依微認涕笑。凌沈見纖短。停吹歛泯滅。耽耽復空館。靈物信所真。顧恨知音罕。潭潭故邑井。猗猗上宮蘭。不食自清潔。莫服見幽閒。志士恥窮極。卷迹甘飢寒。佳辰邈良覲。觸物懸悲端。入途眇回遠。經歲曠音翰。豈不慕裘馬。詭得非所安。蟬冕多怵迫。繩樞尠憂患。枉尋竟何補。方柄誠獨難。  
出長夏門原注。初望龍門。

出郭心已清。青山忽相對。游人傍流水。俯仰秀色內。誰張蒼玉屏。中斷神斧快。清伊瀉其間。銀漢曳天派。參差樓觀出。杳靄林麓邃。巖聲答遠響。水影弄空翠。同遊得君子。原注。同榮教授。與與烟霞會。選勝雖自茲。高懷已塵外。

飯昭果寺

飄然乘興遊。殺酒笑俗具。僧居致野飯。草草亦有趣。山僧慣迎客。煮茗新泉注。岩花得春遲。晚秀見紅素。蕭蕭野市井。人物自來去。溪光送孤舟。石色照素樹。題名掃高壁。歲月記所遇。書罷迹已陳。出門猶反顧。

渡伊水

雙崖若爭妍。秀色日相射。遊人誇水東。揮榜渡清瀉。潺湲溪邊風。五月自蕭灑。中流望南北。河漢自天下。嗟予水鄉客。塵土困蹈藉。江湖久懷歸。無地稅征駕。臨流動長想。照影久悲咤。滄洲倘有歸。功業付高謝。

白公祠



斯人不可見。千古懷清風。猶想鸞鳳姿。俯然山水中。空祠遺像儼。過者爲肅恭。同時富貴人。泯滅知何窮。公昔得所遇。慨然屢輸忠。一傷巧舌刀。泯默類瘖聾。出處竟無禍。卷舒詎知蹤。被獲空歎麟。不制方爲龍。

上皇龕

升危躡石梯。已覺毛骨異。玄龕剖山腹。六月霜雪至。佛臺磨青瑤。紺滑不留水。巍巍數天人。蒼玉刻冠佩。老僧拂高崖。上有昔人字。國都已蕭瑟。山澤隱遺事。西軒俯空闊。晝夜納蒼翠。卜築莫後時。林中有餘地。

石樓

清溪若奔虬。八鎮束其頸。犇騰去莫脫。擺掣恣馳猛。嘈嘈戰風霆。萬鼓助其勁。聲驅石崖動。氣抱晴日冷。我來怯初登。注視久乃定。悠悠山川闊。寸目羅萬景。平生林野趣。疏放謝鞭警。會期山月出。一嘯清夜永。

上方

足躡青玉磴。躋攀不知勞。回頭瞰木杪。始覺所歷高。孤鳥去滅沒。奔溪深怒號。白日當畫梁。青雲送微颺。坐久神慮平。微涼清骨毛。但警塵垢容。俯仰近赤霄。古壁有遺字。昔人嗟寂寥。南風不知暑。古木常蕭蕭。

三龕

萬穴列巖壁。三龕獨雄夸。封山鑿其骨。開像儼且呀。悲哉輕人功。不計歲月賒。像成竟何補。國破荒蓬麻。悠悠清伊水。去去縈山斜。晚渚栖暝鷗。夕波戰餘霞。陵谷良未遷。古今如轉車。應有千年鶴。歸顧如咨嗟。

晚飯寶應

晚風吹古栢。落照明空山。深行得寶刹。崖嶺相回環。人遠草木邃。境幽魚鳥閒。道人掃華堂。延我具晚餐。齋庖野菊美。石井新泉寒。既飽陟上方。浮香出林端。平生麋鹿志。強學伏車轅。塵懷造勝絕。欲去猶三歎。

廣化遇雨

浮雲蔽高峰。臺殿延晚色。風聲轉谷豪。雨脚射山白。東樓瞰虛明。龍甲排松栢。蕭森異人境。坐視動神魄。撞鐘寺門掩。晚霽尙殘滴。相攜下山去。塵靜馬無跡。歸來解鞍歇。新月如破壁。但恐桃花源。回舟已青壁。

寄子瞻舍人二首

皎皎連城壁。實爲天地珍。足傷曾不售。實氣終氤氲。山川媚餘秀。星斗攬奇氛。終然不可掩。三浴祓埃塵。天王齋戒受。嚴庭具九賓。貯之黃金臺。藉以九龍茵。事稱忘禮厚。人誰駭其新。車輪走四方。爭覩快一陳。無瑕故易傷。斂輝志乃神。

贈楊念三道字

紛紛名利場。向背不知醜。翟公書其門。客態自如舊。勢去競詆沮。有餘巧升斗。高賢少哇咻。小子多狀候。退之呼字生。房相肆琴叟。事奇出意表。欲辯不及口。神明勞忠孝。福祿日方厚。防微無早計。求福常恐後。

曉赴祕書省有感

黃鶴樓前月。清輝千里寒。娟娟過江北。送子別長安。長安百萬家。車馬無時閒。中天聳觀闕。四海會衣冠。憐爾薛羅子。豪華駭新觀。蕭蕭囊中句。飢坐奏清彈。漫郎久不愜。逸思生風翰。寄聲武昌魚。欲從僮父餐。

桃李欲開時。長安春正好。晴空倚闔闔。朝日散馳道。雲收龍蛇榜。爛爛金碧曉。清都不容塵。虎士守洒掃。家無當關警。襟袂色顛倒。何慚驅款段。吾事不須早。儒生近卜祝。本自異時好。聖朝尙文雅。詔使窺鴻寶。平生一盃酒。江海送吾老。靜喧非人事。不得守懷抱。跳梁干造物。乃取錢鄒誚。委懷隨所遭。千葉纔一笑。贈无咎以既見君子云胡不喜爲韻八首

平生懷想人。握手良未易。接君同舍歡。此事非此世。十年淮海夢。一笑相逢地。投分白首期。願言何有既。賢愚譬觀形。美醜不自見。醫肱待三折。劍鐵要百鍊。磨君古青銅。汰簡寄明辨。一智出千愚。食芹敢忘獻。文風還正始。磊落有諸君。長者進後生。亦使我有聞。譬如狸與虎。偶使竝稱文。終然不可及。困我力空勤。文衰東京後。特起得韓子。支撐誹笑中。久而化而靡。籍湜既洒掃。後生始歸市。垂君拯溺手。請效我一指。詩壇李杜後。黃子擅奇勳。平生執編約。開府與參軍。舉詩兼筆徒。吟哦謾云云。安知握奇律。一字有風雲。觸有羸其角。進有跋其胡。膏車秣吾馬。白日在修途。雖乏亡何杯。頗多未見書。力學致事功。良田本深鋤。黃子少年時。風流勝春柳。中年一鉢飯。萬事寒木朽。室有僧對談。房無妾持帚。此道人人事。誰令予獨不。南山縛虎師。肯顧世書字。揚眉哦楚喉。鼎畔倒侯喜。詩聲一蒼蠅。下到霹靂耳。庸庸老尋常。物外有奇偉。昨夜月中一睡殊。有秋色覺書所見戲呈道孚

幽人息遙夜。四聽市聲寂。月華清可掬。天色紺欲滴。候蟲先知秋。微響出陰壁。精瑩高露溼。斷續殘河白。興懷我自出。抱器方待擇。感時當有作。陋巷奏金石。予方問農圃。朝市嗟掃迹。先寒戒裘褐。歲暮養老客。

東園

荒園何所有。落葉與衰叢。含芳未肯吐。惟有木芙蓉。黃菊如佳人。綠萼包金茸。併隨重陽酒。娛此憔悴翁。

次韻淵明飲酒詩有序

鄙性嗜酒。親友所知也。紹聖丙子。得官明道。寓居宛丘。職閒無事。終日杜門。人知其好飲也。或饋之酒。不問寒暑。日輒數酌。飲雖不多。而樂則有餘。因讀淵明飲酒詩。竊愛其詞文而慕其放達。因次其韻。嗟余與淵明神交於千載之上。豈敢論詩哉。直好飲者庶幾耳。得詩十一首。

我欲常飲酒。俗事苦奪之。飲酒不得醉。何如未飲時。顛倒衆譏笑。佳處正在茲。念此雖杜門。濁醪日常持。出門憚應接。俗士不多情。對酒輒拜辭。好禮以求名。嗟嗟名幾何。曷足善爾生。共處一泡中。倏忽風濤驚。好飲信無補。不飲亦何成。

我久喜文詞。思與鴻鵠飛。老來覺非是。念昔正可悲。買金鑄杜康。百拜誓歸依。晉陶與康伯。九原吾與歸。涉世苦不諳。多病身早衰。惟有尊中酒。不與我心違。

處樂非縱情。處靜非避喧。豪華與枯槁。彼各據一偏。悠然獨樂處。在我不在山。羲皇迹已遠。三酌呼可還。一罇每獨睡。不待賓客言。

所嗜人不得。一物百非是。猶有尊中酒。道勝無敢毀。彼哉譏謗者。誑口而信耳。當憂十八隔。罰此繆語綺。自庇無一椽。道人分半宅。屋西羅古殯。寒草無人跡。纍纍長與少。豈復待年百。鴉飛朝樹疏。蟲弔宵月白。

平生或不飲。至此方知惜。  
曹參漢賢相。掾吏亦豪英。四海付醇酒。乃真知物情。亡秦餘毒烈。一洗百壺傾。和氣薰醉人。金革乃不鳴。  
卑卑談治道。陋矣洛陽生。

種樹東簷下。雨來發幽姿。微陽動九地。光彩變新枝。榮衰一以異。枯槁易神奇。消息天使然。人工徒爾爲。  
杜門沽酒飲。高懸吾馬羈。

里有好事者。我往罇輒開。我亦爲之盡。每往亦開懷。尙慮數見厭。動作旬月乖。今晨起苦晚。獨坐見烏棲。  
冬溫雪作雨。里巷苦多泥。且復閉門坐。開卷理多諧。誰知無言中。獨往不自迷。得意復終日。弭車不復回。  
弱歲慕世名。中年頗探道。世間無非苦。病死與生老。相尋無窮已。遞代作榮槁。奇哉竺乾書。百遍讀愈好。  
汙泥雖云濁。本不害吾寶。酒雖破淨律。吾事在律表。  
昔嘗罹厄疾。一臥輒踰時。念無所歸咎。乃誓與酒辭。那知偶不死。持杯復飲茲。旣飲輒爲盡。快哉復何疑。  
神暢病自失。此說信不欺。藥石傷天和。此方吾笑之。

與潘仲達二首

東風沛甘雨。百物一時好。江南桃李盡。紅紫到百草。道傍負擔子。寒食歸祭禱。念我淮上丘。三年不躬掃。  
淮陽牡丹花。盛不數京洛。姚黃一枝開。衆豔氣如削。亭亭風塵表。獨立朝高尊。誰知臨老眼。更復美葵藿。

莎雞

金風透殘伏。玉樹先秋涼。嗚嗚草間蟲。感時振衣裳。楚客思萬里。夜吟怨藜牀。勞勞終夕語。共此簷月光。孤輪曳獨靈。折管韻哀傷。辛苦幽父兄。無衣畏風霜。

宦遊

宦遊吾漫爾。未慕致身早。秋來憶山苦。遙夜夢顛倒。鳴蟲待誰聽。落葉煩我掃。誰復省勞人。吾生常草草。

次韻秦觀

琬琰非世珍。昔以羊皮換。嗟君復何求。衆棄乃所玩。十年少游兄。閉口受客難。二毛纔一第。俗子猶憤惋。人間異巧拙。善琢貴顏汗。嬋娟守重閨。倚市爭倩盼。君胡寶滯貨。屢辱訪衰悞。譬猶仆臥塗。更侑觥與散。球然瑚連質。磨琢爭璀璨。遲君三年鳴。更用驚我慢。

阿几

小兒名阿几。眉目頗疏明。日來書案傍。學我讀書聲。男兒事業多。何必學讀書。自古奇男子。往往羞爲儒。阿几笑謂爺。薄雲無密雨。看爺飢寒姿。兒豈合貴富。翁家破篋中。惟有書與史。教兒不讀書。更欲作何事。

宿虹縣驛

長隄隘舟車。上下無暫歇。煎熬古驛門。聒聒爭瑣屑。東南淮浙富。輸餽日填咽。楚風習喧卑。吳舌動嘲晰。平生耽靜意。投鬧劇含噦。况茲道路勤。強食慰飢渴。年來嵩洛興。久與泉石結。終當卜吾廬。雲山對華髮。

有感三首

一春苦多風。桃李見無幾。良遊時已失。忽忽三月尾。中間亦何有。徒自亂心耳。所嗟違所娛。坐費良日晷。堂北千葉桃。微本混榛枳。居然未之省。一日燦相視。零丁不忍摘。攀玩聊自慰。乃知物雖微。未知卽疏棄。從今至零落。猶足伴尊載。乃煩芊綿草。藉我花前醉。

昨日鴉作巢。今日鴉哺兒。念知三月闌。春物行已稀。晚風颯不收。殘紅怨餘姿。回風起輕寒。擁爐火重吹。燈明夜齋靜。目澀臨書遲。病齒不飲酒。持盃勸妻兒。豈無兒女心。惆悵桃李蹊。彼昏安目前。丈夫方有思。古今不殊途。掩卷獨長想。炎爐與死灰。相去如反掌。彼昏誠不知。一醉富莫量。那知道傍殍。曾是厭盃盎。一金短販兒。豈暇議得喪。但憐反覆閒。觀者爲惆悵。聖賢蹈大方。不苟目前妄。寄身愛憎閒。得失眞一餉。

食菜

大雨困淋漓。小雨傷靈霰。哀哉南畝人。日夜塗手足。入倉無一粒。敢忘祈報福。餘功歸老圃。畦菜青滿目。長官卻野餽。性命赦雞鶩。何須問清白。薦德芻一束。歸來輟食歎。每悔釜炊玉。青衫尙如此。何況膏粱腹。願君少自寬。謀遠須食肉。

王子開朝散早年以疾病謝事還江陰求詩爲別三首

濟物昔所務。捨耕還自非。駸駸老將至。忽忽意多違。門有王夫子。柴車謝事歸。令人三歎息。羞澀向塵衣。田園何日到。水國先秋寒。興來出飲酒。興罷歸杜門。漫郎遊已倦。老眼亂丹鉛。扁舟肯載我。共看雪濤翻。避祿免危疾。棄鉛得黃金。鬚眉藹如漆。便覺老難侵。江湖足幽遜。市卒或可尋。莫思芙蓉子。丹田亂君心。

暮春奉女兄弟集宴堂

晨暉麗花柳。流水灑池塘。暮春漸暄燠。華構肅朝涼。使君箴領暇。亦復陳壺觴。班坐豈異人。骨肉皆歡康。遙山出遠翠。遠水明斜陽。歡言不期醉。淡泊味何長。

窺園

吾老懶讀書。得閒嘗窺園。愛此千樹雪。高低不勝繁。衝風掠之去。頗已隨沙塵。感之可奈何。我豈土木人。畏病不飲酒。已慚嵇阮真。淡泊非衆嗜。自娛難及賓。獨遊還獨吟。魚鳥與我親。悠哉山林趣。媿此簪纓身。馬巨濟董役。魏王墳作詩寄之。

城北牛脾山。千邱壓其麓。事皆有司辦。聖世數厚族。園林迫復土。百役興甚速。煩我別駕公。侵星次空谷。郵亭舊客去。二刷錢官皆去。閒日睡頗足。聞鶯有佳興。徙倚近喬木。櫻笋味鼎來。管絃調漸熟。期歸酌燒酒。及此未炎燠。

出伏後風雨頓涼有感三首

秋風振秋曉。萬境一淒清。幽草蟲響息。高葉露華凝。戢翼烏尙宿。引吭雞屢鳴。淹留度華歲。悵然難爲情。三伏如湯釜。熏煮理亦足。西風半夜雨。牕戶一清肅。那能惜搖落。共喜過炎燠。老人亦晨起。稍進杯中醪。殘暑扇中盡。新涼枕上歸。微雲起平遠。空碧上朝曦。稍感夏衣薄。漸傷高葉稀。來鴻飛集喜。卒歲稻梁肥。

太寧庭栢



微風起清籟。烈日交翠陰。蔭茲金仙居。樓殿鬱沈沈。永日燕雀下。有時鐘梵音。誰能悟斯道。來此契無心。

暇日步西園感物輒爲詩得七篇  
醑醺

欲知此園古。請視醑醺蒼。孫枝已輪困。走蔓龍蛇長。春風一吹噓。灼灼發奇光。仙姝不可挹。順風飲其香。

秋圃

秋圃寂無有。蕭條殘菊枝。老蛩依日叫。暗蝶傍人飛。鎖澀門開少。莎身人到稀。舊遊渾記得。到處卽如歸。

菊叢

下根盤秋泥。上葉披宿雨。惟餘黃金蕊。秀色日夜吐。寧須薦九日。但惜歲行暮。吾將屑落英。持泛蘭皋露。

芙蓉

清霜厲嚴殺。松柏氣不振。芙蓉乃微木。晚豔獨嬌春。穠粹覺蘭疲。芬敷知菊貧。欲攀無所贈。聊復插吾巾。

橘

奇林蘊貞粹。健葉圓青鮮。中有碧瑤實。正味百果先。貢包登堯俎。頌德列騷篇。李衡空庸材。徒列木奴千。

斑竹

重瞳陟方時。二妃蓋老人。安肯泣路傍。酒淚留叢筠。頗疑葛陂化。點點留斑鱗。慎勿脫水去。入世多埃塵。

種蔬

貧舍無旨蓄。種圃治寒蔬。縱橫數席閒。灌溉亦勤劬。積雨有新甲。時摘付中廚。何勞樊遲學。當問漢陰夫。  
所居堂後北籬下。獲二蛇一。小色赤長二尺許。一大色黑長七尺圍四五寸尾。可貫百錢。盡放之。  
二物穴我居。歲月亦已老。一朝雙擒獲。蜿蜿出幽草。安行免噬齧。敢望吐珠報。已月不殺蛇。昔賢有遺告。

小雨效韋體

午景蔽浮雲。芳林散清雨。虛臆度遙吹。稍覺青葉舉。殘蔬知夏雨。隕葉兆秋序。幽獨無往來。烹茶誰晤語。

# 柯山集卷八

## 五言古詩

納涼

靡靡春事退。寂寂夏日長。日西騎馬歸。臥此北戶涼。官事幸休逸。甘爲白頭郎。朝出暮還家。悠悠愧路傍。所欣藥物靈。頗覺疾病康。幸免三已愠。敢希五饋漿。難堪匕有餘。不過三已嘗。呼兒且糲食。貧固士之常。三伏暑甚。七月八日立秋。是日風作涼爽。炎酷頓消。老病欣然。命酒成二詩。

西風吹淡日。牕戶含淒清。炎涼一朝變。徂暑逝不停。山堂曉瀟灑。病叟巾褐輕。平時干雲樹。芳葉亦復零。苦熱逢三秋。西風颯然起。金氣入草木。傷夷從此始。盛極衰從之。循環固其理。老翁復何事。新涼欣酒美。白樂天有滑上雨中獨樂十餘首。做淵明子寓宛邱居多暇日。時屢秋雨。做白之作得三章。

寒極則有暑。晦久則有明。開闢迄今茲。此理信可憑。炎炎者易滅。巍巍者必傾。聖智無奈何。況此愚昏氓。設羅以獵獸。切骨陷其膺。重勢以鎮物。懸絕壓其案。此下脫四字。與育力有不獲呈。物情千萬變。可盡得經營。案此下脫四字。士葛帶而蘭纓。無求復無憂。容貌甚和平。案此下脫一句。秋氣日姿清。悠然有佳興。美酒時一傾。

罷官臥窮巷。值此雲物稠。連延經旬雨。城市欲行舟。柱礎變坳塘。瓦溝成暴流。蕭然殘暑退。寒事戒衣裘。老人朝睡足。起坐梳白頭。呼童飭晨餐。薪溼爨婦愁。洗我朱提杯。不復具肴羞。一觴已徑醉。萬事良悠悠。故人遺我酒。氣味芳以清。置之屋壁間。興至時一傾。銀杯度一合。三醕已徹觥。既免戒沉湎。且無憂病醒。稽阮愧令德。劉石無遐齡。荒狂有何樂。徒以酒自名。吾幸免因此。庶幾盡平生。

謫官黃州至南頓驛同李從聖叔姪小飲

共飯何草草。客來從遠道。傾壺得殘酒。聊以開懷抱。年將半百兩鬢華。謫官憔悴來天涯。神理可憑吾道在。不應長遣路人嗟。

權勢

權勢世所重。桓溫役孟嘉。桓公自人雄。爲下未足嗟。頗怪蔡中郎。爲董受疵瑕。因之以取死。曾不念漢家。士固感知己。尙安知其他。搜牢則可誅。好邕自其佳。

臨文

一病廢百嗜。好文心未忘。南窗納虛明。羅烈陳縑細。茫昧考巢燧。典章斷虞唐。清妍進屈景。雋永旌蘇張。少狂不自料。遇事形文章。誤逢作者嘆。因復力披攘。蹉跎生白髮。始紬石室藏。粗見漢家事。濡毫時否臧。文詞比工祝。不殊公卿行。何用疲心精。舍本棄耕桑。讀賦意陵雲。律令尊張湯。榮華繫遇合。才技無短長。頗師老氏術。抱璞和其光。無營以卒歲。刻意翰墨場。

自淮陰被命守宣城。復過楚雨中。過道孚。因同誦楚詞。爲書此。以足楚詞。  
秋庭新過雨。佳菊獨秀先。含芳良未展。風氣已清妍。金鳳汝妾婢。紅紫徒相鮮。老人對節物。昏昏祇欲眠。  
與子讀楚詞。亶亶忽盡編。嫋嫋兮秋風。慄慄在遠行。蟋蟀鳴西堂。淹留了無成。

寓陳雜詩十首

傳舍不可久。束裝投新居。新居亦苟完。佳木頗扶疏。洒掃尋丈地。琴書遣朝晡。風雲中夜變。大雨如決渠。  
落點若強箭。穿我老屋塗。中夜起明燭。移牀護吾雛。傳聞北城隅。老弱隄上廬。官吏操畚鍤。紛紛役千夫。  
蝥漏或一決。城圍變江湖。吾衰也久矣。豈復憚爲魚。

昔記古甲子。商滅而周興。如何雨此日。乃爲霖雨徵。陰陽久乖張。此事頗有憑。豈天悔牧野。洗此漂杵腥。  
舊雨水未乾。洞房苔欲青。新雨雖霏霏。欺我膳善崩。虛堂就夕眠。永夜秋桐聲。蕭然秋氣至。起覺巾履輕。  
憐我老病者。三伏困薰蒸。得涼且飽飯。何暇念秋成。

朝雨如琴絲。咫尺不相辨。俄然晨光漏。紺碧出天面。天工易明晦。頃刻俄屢變。今朝事大定。雲物卷組練。  
客有北來說。蛛生被數縣。穀穗無一粒。遺稭如立箭。卑田成大澤。投種哀莫見。官人懵不知。猶喜輸租辦。  
興懷及鰥寡。猶愧吾飽飯。

唐有元相國。實殺顏平原。平原腹有丹。尸解神已仙。顏公死已矣。人見如生前。致令遺其像。委曲與人言。  
相國死倉卒。穢蟻塞其咽。家門隨手破。但怪椒斛千。顏公黃塵外。風節猶凜然。元子墮九幽。遺臭萬世傳。

清夜何晏晏。客眠亦復佳。鄰鐘喚我覺。咽咽聞城笳。披衣行中庭。星漢已橫斜。缺月挂西南。皎皎流清華。莎雞振其羽。蟋蟀旁悲嗟。悠哉歲已秋。日月如奔車。

開門無客來。永日不冠履。客知我老懶。投刺輒復去。端成兩相忘。因得百無慮。故人在旁郡。書信不能屢。興哀東坡公。將掩郊山墓。不能往一慟。名義真有負。可能金玉骨。亦遂黃壤腐。但恐已神仙。裂石終飛去。疲馬齒枯草。閉門苔蘚深。閒坊居人少。秋日疏槐陰。境寂心亦閒。蕭然散巾襟。靜中有深趣。因見至人心。谷神古不死。茲理良可尋。無令兒輩覺。一撫無絃琴。

念昔爲吏日。朝夕羨人閒。解印出公府。翛然若歸山。衡茅三畝居。無客門常關。早眠而起晏。永日或不冠。故人遠寄酒。爲致一醉歡。我亦領其意。呼兒具杯盤。長閒貧亦好。安用朱其轡。我生本蓬華。久已傲飢寒。我不知暑退。但覺衣汗乾。頗怪庭中天。湛然青已寬。有物叫草根。啾啾自相喧。問知已新秋。大火流金天。九土變寒暑。正爾事亦繁。靜觀付一笑。吾事寧相關。但無筋力健。悠然佳意還。喧喧憎隣里。砧杵亂人眠。秦子死南海。旅骨還故墟。辛勤一生事。空得數編書。琅琅巧言語。玉佩聯瓊瑤。知者能幾人。憎者頗有餘。書生事業薄。生世苦勤劬。持以待後世。何足潤槁枯。興懷及昔者。使我涕漣如。道路阻且長。悲哉遠撫孤。

寄李端叔二首

東髮聞至道。榮辱久齊觀。中年嬰世故。已復傲憂患。閒居雖荒寂。几杖頗清晏。悠悠閒暑景。草草貧寢飯。狂言無爲發。濁酒醉自勸。與君通家舊。邇者頗屢見。相望豈云遠。數舍隔異縣。吾人師佛祖。妙旨得忍粲。

斂藏避世俗。未免逢侮訕。坐令鬢垂雪。猶把從事版。尺書每見警。妙語珠在貫。復君進明德。同遂邱壑願。陳墟自古皇。疆野實楚縣。沃野接神畿。荒溝漕淮甸。民風靜而陋。原隰平以遠。我來逢艱歲。禾黍秋色淺。荒居困蝨蚓。風雨老藜莧。閉門謝車馬。隱几親筆硯。馬跡巷泥深。庖烟簷日晏。深居窺老易。妙理殊自玩。困亨方寸足。夸安勞遠願。乖離感歲月。老色各滿面。友道古所敦。尺書莫辭倦。

秋日曬古城

秋日曬古城。西風振塵埃。出門何所之。壞道連蒿萊。飛鳴雞犬稀。破屋枯壕隈。老圃理蔬畦。晚甲瘦未開。輸人暮出城。栖鷄一一回。悵然心不怡。歸坐勸一杯。

古意效東野二首

與君雖異坊。秋涼各平分。已遣月入牖。更教風掃門。照君幌中寢。拂君堂上塵。綢繆似衣帶。終日遶君身。扇不風自涼。身不蘭自香。深居不出門。幽獨更清揚。爲鶻栖君樹。爲燕巢君堂。不食亦可飽。況乃餐輝光。

早稻

早稻如倒戈。十穗八九折。晚稻不及秀。日炙根土烈。踏車激湖水。車衆湖欲揭。得泉如沸湯。旱土溼未徹。老農祝天工。叩額眼垂血。游雲不作雨。風至輒散滅。昊天未悔禍。牲玉無徒設。誰能縛妖魅。救起龍撥刺。

鳴蜩

鳴蜩嘒高風。逮夜且復靜。草蟲何爲者。落日鳴復逞。陰陽且戰爭。微物何所競。化工執其機。開闔惟所命。

朔雁有行意。肅肅如待令。江河有舊渚。寧畏風霜勁。

書初涼夜至將曉靈壽寺作

秋房燈火清。人語久已寂。城遠不聞更。警柝鳴未息。橫參已入地。斗柄當天直。乃知三更中。市塵已寂歷。我時守書几。磨墨傾硯滴。反覆小學書。昏目如芒刺。試尋鄰房僧。鼻鼾背負壁。體勞徑就枕。冷夢分南北。覺來寺鐘鳴。僧禮像前席。須臾聞梵唄。木魚如叩石。舉頭視東牖。朝日已淡白。反身起投衣。神爽健筋力。亟來酒甕邊。側聽聲唧唧。

秋日喜陽介吉老寄藥

閒坊遠市聲。終日掩衡門。惟有風中葉。蕭騷終日聞。午枕不成寐。起坐無與言。喜開故人書。珍藥幸見存。其方受仙聖。其效未易論。豈惟獨沉疴。庶可輔本根。珍重復珍重。厥價萬瓊璠。永年未可有。庶保無天昏。見黃仲達感秋意

秋風吹衡茅。寂歷如荒村。獨立無與語。悲蟲鳴草根。老木經疾風。枝葉僅得存。礎蔭不滿地。白日耿當軒。北城有黃仲。眸子清不渾。時能出秀句。寶鐵雕瓊璠。念將舍我去。爲吏國西原。荒涼古中牟。晝夜輪蹄奔。青衫給吏役。懷惡未易論。強顏詭應接。有抱誰有言。從容來去閒。無厭走黃昏。原注：黃每相訪。常以昏夜。

服仙靈脾酒

冷氣侵吾脾。趨拜劇苦艱。仁哉神農氏。遺藥驅恫瘝。持錢取之市。易得如芴蕘。繁枝與芳葉。盡取無可刪。



貯之白練囊。漬以壺酒寬。七日以供飲。跛曳皆翩跹。呼兒謹蓋藏。用此九轉丹。平生誤信書。安坐得老還。方書豈盡信。柳子固無言。事固有然者。豈容盡欺謾。疾走非吾願。且復輔羸殘。

孫志康許爲南釀。前日已聞糴米欣然作詩以問之。

平生一尊酒。風月不可無。謫官將十年。一醉未易圖。市豈無旗亭。官亦有酒壚。薄乃捩齒酸。一滴不可沾。英英孫夫子。臭味真吾徒。自云得異蘖。乃出粳稻腴。歲久精粹出。去者乃其粗。醞釀纔浹日。芳甘已盈壺。僮人驗其力。若火經茅蘆。此語真野陋。殆出負販夫。前日聞吉語。糴米已在途。每恨乏陳糲。價直如買珠。憐君久客囊。傾倒無復餘。假器走僕僮。供我一笑娛。欲爲漉巾漚。請學滌器如。作詩以訊之。何日陳尊孟。夜書

踏踏夜烟青。寥寥秋漢迥。海月出天高。霜雲泊天靜。鶴鳴知露寒。樹影當軒正。幽客獨未眠。經窗夜聲聲。小雨

梢梢陰靄集。肅肅春寒生。窗燈耿初照。小雨細無聲。還來就溫壚。依然有故情。燕坐悄無語。軍城遞遠更。

月夜懷陳永源

衆喧息遙夜。爽氣清煩襟。殷勤低簷月。入幌來相尋。平生學虛靜。每爲多病侵。臥想陳夫子。幅巾修竹林。冬日放言二十一首

清冬萬境肅。墻戶益蕭然。薄寒惟可飲。短景不容眠。貧廚烟火暖。塵釜亦烹鮮。且復養口體。何勞更問天。

湯餅慰朝餒。三杯澆旦寒。醉飽外何欲。昏然宵就眠。幽通夢有告。默存神自全。蕭蕭松竹舍。歲暮聊盤桓。風雨連江氣。十月如深冬。坐曹日暮歸。密室溫爐紅。慘慘庭下日。騷騷窗外風。三杯容我醉。萬事聽天工。小兒喜學書。滿紙如栖鴉。老婦寒不績。當戶理琵琶。樽中有神物。快寫如流霞。三杯任兀兀。凍臉生春華。卯飲終日醉。萬事付悠悠。醺然據榻暝。簷雨方颼颼。吾事幸無急。不醉欲何求。願謂婦與子。酒盡爲我謀。寒羊肉如膏。江魚如切玉。肥兔與奔鶉。日夕懸庖屋。嬉嬉顧妻孥。滋味喉可欲。謫官但強名。比者何不足。酒聖卯時歡。此語聞樂天。安用苦了了。白日供愁煎。浮世本幻妄。空花電露然。人間無實事。惟醉庶幾焉。愈老愈嗜酒。益醉益自然。兩人同墜車。醉者乃得全。我不但醉酒。天和醉心源。當其醉甚時。更類癡與頑。至道與物反。夫豈會俗心。聖處有閭域。扃鑰一何深。時時資美酒。可及其門。送君者既返。君駕胡可尋。清晨坐官舍。官舍復何有。離披經雨菊。蕭疏委風柳。飽食或至睡。涉筆無可否。油然有好懷。日暮歸飲酒。日暮歸飲酒。兒女戲我前。須臾徑三酌。據榻已醺然。老妻坐我傍。饋載屢炮煎。大勝劉伶婦。區區爲酒錢。我初謫官時。帝問司酒神。曰此好酒徒。聊給酒養真。去國一千里。齊安酒最醖。失火而遇雨。仰戴天公仁。吾腹如鷓夷。但滿貯醖酒。外圓故不滯。中靜一無有。紛紛千百輩。納若一塵垢。下而至真源。保之故難朽。淮陽名都會。爽塏太昊墟。最愛西城道。汪汪數頃湖。古木巢翠鳥。清濠見游魚。幽居多不愜。懷我平生娛。靈通古叢林。他日休吾車。出門循古城。荒圃畦寒蔬。手種堂下花。頗已數尺餘。何時攬其華。故人應念予。塞向久室處。帟幕亦復周。溫爐熾薪炭。永夜炎光流。五更屋霜重。重衾如無裘。興懷無衣子。卒歲聊優游。

陶潛經世才。黜齟不得肆。彼寧徒嗜飲。有蘊託諸醉。時時吐高詞。頗復見一二。義熙書甲子。此意有涇渭。葛公蓋世才。功業亦云偶。世無左將軍。老作躬耕叟。皇天挺奇產。必使有所受。珠玉在山淵。終爲王府有。秦人焚詩書。意欲遂絕滅。六經至今存。何曾損毫髮。興衰有天理。人力自淺拙。不憂驪山墓。回首遭蒼掘。元子本豪爽。頗復有俗氣。孟嘉亦可人。乃與較權勢。爛強盡百年。究竟成何事。江左無英雄。汝得免徒隸。淵明非無心。似以酒忘憂。如以藥愈疾。未佳寧免憂。我直好飲耳。與世本悠悠。人間有何事。奚足煩杯甌。

四月望日自孝悌坊遷冠蓋孫氏第

青蕪滿古城。白日照大澤。街荒雞犬鬧。市遠喧闐寂。中有騰騰者。淮陽四年客。坐儉太倉粟。穩睡而飽食。平生願陳力。衰老困逼迫。何曾一可意。但有百無益。儉安淺夫志。苟且志士惜。窮通有天理。誓不安苟得。朱陽方肇序。春去無轍迹。悵此復幾時。撫事三歎息。

謫官

謫官成吏隱。古寺度高秋。寒燈明夜室。清坐聞更籌。裘葛屢往還。感彼歲月遒。吾意方有會。誰與賦離憂。

十月二十二日晚作三首

黯黯東牖闌。寂寂吾廬閒。粗糲飽婦子。首宿無餘盤。雁急天欲雨。雞栖夕已寒。老人袖手坐。一杯聊自寬。天寒聊飲酒。再酌已停觴。豈不欲酣暢。要使夜腹康。意得樂有餘。偶然不必長。寄身造化中。勿使天和傷。蓬華無與處。北風利戈鋌。空爐有微火。且復與周旋。酒隱柴桑叟。醉吟渭上賢。二士忽已遠。遺風載陳編。

題壁

命駕欲詣客。欲去復遲遲。事幸無甚急。何用勞驅馳。家貧幸有酒。亦略具鮮肥。且復東窗下。高歌醉而嬉。

夜坐

萬籟聲久寂。三更霜已寒。老人袖手坐。一氣中自存。自得此中趣。不與兒曹論。但有老孟光。相對亦無言。

任仲微闕世亭

志士抱奇策。常苦不得伸。及其利害出。倏已亡其人。今古同此恨。愚智竟誰分。哀哉老任公。英魄久已淪。惟餘亭下柏。閱世盤深根。紛紛凡草木。幾變秋與春。朝菌與蟪蛄。盡死獨我存。任公不及見。見其賢子孫。請君利斯奇。仍復大其門。

感懷

枯樹桓司馬。五柳陶徵君。微木不足道。所歎此兩人。一埋柴桑骨。一爲九錫臣。榮辱俱已矣。芳穢萬世聞。

次韻題李援舫子

紫髯不復見。故宮無入門。元子亦寂寞。一邱弔遺魂。興亡兩夢幻。今古一朝昏。念當置是事。盡此舟中樽。

秋感二首

秋日無遠暉。秋草無美姿。殘蛩弔白日。寒鳥悲空枝。時節一如此。余出悵安歸。強歌不成音。還坐空涕垂。感動百慮遊。觸心遂紛披。棄捐勿復道。日暮眠吾帷。

秋山多遠聲。日暮尤百態。鳴風落高樹。清澗瀉寒瀨。鳴蜩默誰憐。瘖死不償罪。蛩猶不已有。慙未逢解。天時激汝曹。寧自知進退。吹噓成踴躍。芻狗忌徹祭。庭空月宵掛。園冷露晨沛。嗟哉心雖忘。俯事還感慨。

夜思

江邊鷓鴣鳴。栖我屋南樹。夜深風霜寒。呼鳴自相語。樹頭鴉翼動。樹杪雁行度。朦朧見江山。一一翻飛去。

嘲南商

兩袖全匹帛。望知江淮客。深藏計算苦。好鬪意氣窄。愁逢湯餅盃。遇鮮論壺咋。市南沽茅柴。歸店兩額赤。

種芭蕉

幽居玩芳物。自種兩芭蕉。空山夜雨至。滴滴復蕭蕭。涼葉泛朝露。芳心展夕飈。東堂日虛靜。秀色慰無聊。

無題

蔌蔌鳴葉下。初無風過之。流年一如此。慷慨使心悲。平日談堯舜。立朝羞自私。溫爐煖老客。聊復此棲遲。

大雨十日不止五月十八日晚始霽

昊穹忽悔禍。淫雨霽今夕。峯嶺舒紫翠。雲天麗金碧。深蛙鳴遠池。涼葉墜餘滴。漏屋百不憂。宵眠始安席。

天運

天運不暫止。何嘗過隙駒。向來簷前日。忽已牖東隅。樂者苦其疾。憂者怨其舒。由來盛與衰。變滅皆須臾。

悼逝

結髮爲夫婦。少年共飢寒。我迂趨世拙。十載困微官。男兒不終窮。會展凌風翰。相期脫崎嶇。一笑舒艱難。秋風催芳蕙。既去不可還。滴我眼中血。悲哉摧肺肝。兒稚立我前。求母夜不眠。我雖欲告之。哽咽不能言。積金雖至斗。紆朱走華軒。失我同心人。撫事皆悲酸。積日而成時。積時更成年。山海會崩竭。音容永茫然。

# 柯山集卷九

## 五言古詩

### 喜雨四首

陰陽不暫駐。今夕已秋風。晨興綿絲冷。歲月驚衰翁。朝烟爨薪溼。小甲蔬畦空。且復一杯酒。吾生不終窮。手種五色蕉。意待聽秋雨。南風扇旱日。破葉萎不舉。霽霽未終夕。綠潤遽如許。秀色入書幃。已覺青鸞舞。牆東有高樹。夏葉團綠綺。西風纔一夕。蕭颯遽如此。寒螿號其顛。蟋蟀曉未已。羣動催流光。榮華難久恃。隙地秋日曉。寂無鄰里音。惟有草根蟲。風前咽復吟。悲歌者誰子。徂年驚苦心。青燈夜齋靜。微溫生薄衾。

### 次韻曾存之直舍種竹

曾郎風塵表。不似宰官身。吏舍數竿竹。鑿池水粼粼。此君不可疏。亦復未易親。虛心澹相授。頗似南郭鄰。我知王子猷。正是君輩人。

### 贈蔡彥規

我不見蔡子。杜門十日餘。今日叩我門。滿手攜瓊瑀。鏗鏘寫我前。雜以貝與珠。我愕不知報。低頭驚且吁。讀畢致於懷。餘光溢衿裾。坐令簞瓢室。磊砢堆璠璣。我拙寡所合。甘爲不材樗。嗟君何所聞。屢枉長者車。

我來淮南遊。藹藹子之譽。驂騑走千里。凡馬安能逾。奈予不自量。痛鞭而疾驅。常憂過所往。疲憊傷吾軀。願君少待我。且欲休吾駒。跳奔舍其羣。子樂誰與俱。俯身援其類。是亦仁之徒。不然但用我。畏甚將逃遁。何如少貸之。効技供子娛。我無功名願。與世日益疏。反慕古沮溺。窮年事耕鋤。皇皇吾夫子。憂世亦勤劬。雖然竟何就。孰若安以居。人生各有懷。未用相賢愚。得樂願卽止。安能較錙銖。又疑異所任。勞逸事亦殊。作歌以訊之。子意當何如。

寄劉聲原注在海州作。

別君幾何時。人事浩千萬。身如張射侯。憂愁劇強箭。崎嶇走窮縣。艱苦君所見。未知菽水豐。已感霜露變。羈孤寄窮海。親友誰弔唁。析圖補冬裘。乞米煮朝飯。無聊猶自思。援溺固誰願。人生不終否。此語非我分。英雄伏泥塗。暫晦久必現。如予百不能。理自合貧賤。豈當議隱顯。而有不遇歎。但思竄山林。遠脫人世患。有田足耕耘。有水足罩汕。蕭然便終老。到死百不問。平生泥佛祖。久已師壁觀。況將無生禪。下視有爲幻。吾子出羣材。千牛有餘刃。行當脫塵埃。鳴佩侍清燕。高卑各有得。願勿譏斥黷。不有行道人。誰當佐堯舜。時哉勿自滯。功業在力勸。握手不可期。此計吾行辦。

寄陳九

別來常思君。無異飢待哺。如何偶相逢。握手復告去。念初別子時。芳草纔及屨。天時不可留。再見歲云暮。出門怪子瘦。告我困道路。飄飄千餘里。陸走復水泝。古來黃金盡。壯士色亦沮。斯人獨何少。乃有衣食慮。



才高窮不怨。志大貧若富。吾將告君理。子其聽我布。人生不終窮。否泰亦有數。子其保所有。雖穎囊必露。古來立功名。其始不無忤。得難失自寡。進銳退亦遽。念君歸海濱。誰與朝夕聚。我方困而學。每冀朋友助。一從城北歸。夢魂見已屢。願因南來者。時以尺書寓。

贈江瞻道

我行於四方。其所急者友。嗚呼得之難。百不一邂逅。人心不可齊。若十指於手。隨其短與長。亦各有所取。剛或硬而折。柔有弱而仆。質良文不揚。中美外莫副。寬壺泛以枵。狹盎迫而陋。此猶其大概。瑣瑣難悉究。譬如選長材。棄百不一有。其閒雖得之。猶或煩矯揉。我友居淮濱。飲德悉自幼。豈期羈旅間。乃獲聞警效。嗟君如美玉。外徹中乃厚。埋藏困塵埃。要以不可垢。他人十不一。子乃得八九。餘虧能幾何。不待勉而就。乃知昔求艱。特以見未久。但憂奔莫及。敢憚喘而走。我心子所知。覆豁無所囿。是以行於世。往往得嘲詬。人才如其面。不自知好醜。立之明鑑前。乃見其可否。子於我無嫌。告我當苦口。惟我於改過。竊不敢自後。嗟予迫飢寒。子亦仰五斗。何當兩有歸。投老作鄰叟。

呈徐仲車

朝日照高簷。夜霜猶在瓦。纖纖牆邊柳。春色已可把。殘年能幾何。奔駛劇湍瀉。雖無功名求。衰暮亦悲咤。出門聞徐子。兩計決取舍。爲當勉自修。汲汲不可暇。爲當飲美酒。送老在杯罍。子當指我途。我即策其馬。但恐懶拙姿。終非服勤者。

正月望夜示童子

呼童致明燭。展我窗前書。願謂爾童子。此豈不足歟。得真自忘僞。觀一知其餘。爾觀千萬燈。豈與一燭殊。爾豈不欲醉。舉杯傾我壺。爾豈不欲飽。搆火烹我魚。人生貪外物。要以樂其軀。君求曷不足。安用勞馳驅。贈敦復

敦復想爲詩。目見無全牛。天工忌其才。小邑使拘囚。漫塗以塵埃。訟訊羣喙。尙於紛紜中。逸興時奔流。不知誰使之。警爾爲南遊。驂駟解其紮。鷹隼脫於鞴。山川困搜羅。風月遭嘲咻。舉手聊探之。縱橫爛琳璆。不有同行人。更歌而迭酬。天應憫予勞。久苦暫使休。奈何少縱之一放。不可收。歸來見我喜。逸氣凌高秋。我竊不自量。妄將挾其轡。心知不可追。子幸爲我留。君方嚴旗幟。我亦戒戈矛。將圖詰朝見。百敗非予羞。

讀戚公恕進卷

世方尙纖柔。子獨不可揉。人皆喜啾啾。子語不出口。巉然卽之高。俗子競嘲詬。我嘗要之難。快使暴其有。乃知謗之非。更覺所得厚。由來難小知。此固可大受。讀書常辛勤。世務飽經構。琅玕滿編文。一一可推究。俗儒昧事實。文字工綵繡。可觀不可用。章甫冠土偶。子能獨不然。渾樸謝雕鏤。寧爲目前玩。功見施設後。知心古所難。形兀實難售。嗟君聽者寡。風雨但孤雛。又思理難常。功業亦邂逅。豈令匠石斤。常縮袖間手。無爲扣角歌。且進滿尊酌。但非遠可令。有所待而偶。干將伏黃土。氣乃在牛斗。願君久自安。蔽抑寧復又。

與友人論文因以詩投之

我雖不知文。嘗聞於達者。文以意爲車。意以文爲馬。理強意乃勝。氣盛文和駕。理惟當卽止。妄說卽虛假。氣如決江河。勢盛乃傾瀉。文莫如六經。此道亦不舍。但於文最高。窺不見隙罅。故令後世儒。其能及者寡。文章古亦衆。其道則一也。譬如張樂樂。要以歸之雅。區區爲對偶。此格最汙下。求之古無有。欲學固未暇。君爲時俊髦。我老安苟且。聊獻師所傳。無以吾言野。

寄參寥

春風入楚鄉。與子別經歲。有客過我門。攜君尺書至。昔我出京師。倉皇省家事。遂令千里別。不一執君袂。又聞子亦行。杖屨若飄駛。雖成相思詩。欲寫不可寄。飄飄山水夢。時與飛錫值。乃能以書來。知子猶我記。浮雲隨高風。聚散未可計。遲君冰雪詩。濯我塵埃思。

送胡考甫

胡公精悍姿。勇氣如秋鷹。兵書百萬言。揮塵談如傾。羞戴文吏冠。慨然喜功名。願得丈二笏。爲國作長城。朝廷士力盛。戰馬如雲騰。貔貅飽肉食。武庫森神兵。此豈不足用。麾之若雷霆。如何彼疆鄰。坐敢邀金縢。由來在得將。選擇當至精。譬如養騏驥。有御乃能行。安得偉丈夫。長驅兩隅清。淮南聽公語。乃是衛霍朋。終軍白面兒。尙欲請長纓。縱橫老將手。出袖盍一呈。策馬勿自滯。我將觀厥成。一奮庸將驕。汎灌出精英。立功報天子。執節擁旗旌。男兒當封侯。寧爲老書生。

旦起

漫漫東牖白。開幃納晨光。欠伸推夜枕。叩齒披朝裳。瓦盎汲石泉。漱濯齒頰涼。維茲孟夏初。宿雨清高堂。栖鳥起且啐。露鶯鳴更藏。悠悠曉花殷。落落古柳蒼。西舍初鳴春。東隣出求糧。客馬已別櫪。商車欲踰岡。羲和一陽輝。羣動皆擾攘。有生無不求。誰得偃於牀。人生但如此。勤苦亦可傷。況我病倦鬪。飄飄信風翔。永懷中林士。栖志烟霞鄉。願言寄旅跡。相託以徜徉。

庭草

冉冉朝雨霽。欣欣禽哺雛。鮮鮮中庭草。佳色日已敷。童子惡其蕃。謁我盡掃除。我爲再三搨。愛之不能鉏。人生羣動中。一氣本不殊。奈何欲自私。害彼安其軀。況我麋鹿性。得此亦可娛。延蔓藩籬間。常若田野居。亭亭濯露曉。偃偃披風餘。所嗜乃若此。我生合樵漁。

寄答參寥五首

昔我初見子。子時客京師。聞名久不獲。既得過所知。示我一卷書。大小百首詩。我嗜不可輟。熊蹯薦朝飢。約子彭城遊。念當行有期。中間忽倉卒。決去不子辭。子後來高郵。我居淮之涓。中間無百里。詩句屢交馳。客來得子書。云子久南歸。投書不能讀。恨我聞之遲。使我早如此。扁舟尙能追。遠別不執手。近居不相攜。每念今悵昔。耿耿衷腸悲。子行日已南。我去日已西。音書不可頻。何以慰我思。

蘇公守吳興。山水方有主。子兮從之遊。挂錫當可駐。塵埃困孤鶴。念子久失所。秩風展其翼。道使萬里去。青雲引高唳。爽絕誰敢伍。予駒欲西秣。東我江海鱖。平生二三子。往往在南土。子才得所樂。我拙日益魯。

拳拳相思心契闊不得語。

秦子我所愛。詞若秋風清。蕭蕭吹毛髮。肅肅爽我情。精工造奧妙。寶鑑鑲瓊瓊。我雖見之晚。披豁盡平生。又聞與蘇公。復與子同行。更酬而迭唱。鐘磬日撞鳴。東吳富山水。草木餘春榮。悲予獨契闊。不得陪酬賡。我生爲文章。與衆常不偶。出其所爲詩。不笑卽嘲詬。少年勇自辯。盛氣爭可否。年來知所避。不敢出諸口。時時未免作。包以千襲厚。低心讓兒曹。默默衆人後。見君不能已。頗亦陳所有。君豈少取之。時以佳句授。幽絃喜有聽。清唱慰孤奏。如何瞥然去。使我不得友。

蕭蕭江湖客。疏瘦若愁竹。苦心爲詩章。日夜撓心腹。清絃無浮聲。促柱有哀曲。湔湔幽巖泉。一一清可掬。人生於文章。初苦力不足。及其成欲售。又困瞽者目。子從吳興公。乃獨獲所欲。得意有知賞。幽懷免窮獨。嗟予失所投。痛學自藏覆。子當慰我窮。時寄書數幅。

夏日雜感四首

我前十日至。柳葉不蔽日。我後十日來。芳條如紺室。枝間有好鳥。鳴和若琴瑟。渠渠哺其雛。啄我園中食。稍稍筍成竹。濯濯草過尺。心驚歲已半。念此日月疾。朝來數葉墮。盛夏有萎色。悲哉一陰生。長養從此極。士而懷其居。孔子亦云非。賢臣事晉侯。夜載使逃齊。酖毒比晏安。君子不可怡。樂小必害大。安近遠之迷。野芻養騏驥。當念和鑾馳。一飽願卽止。幾何非犬雞。高賢意有在。汲汲不敢遲。安能守槽櫪。長伴兒曹嬉。羣動入夜息。我歸亦安眠。脫我身上衣。援枕體晏然。朝日常營營。有生不可閒。羲和戢其光。幸此須臾閒。

人生一世中。大小無百年。胡爲不自暇。長抱勤苦歎。才者勇設施。誕者夸勢權。彼有驅其心。欲休諒無緣。我本與世疏。少慵老成頑。何爲不引去。坎珂行所艱。娟娟簷前月。雖缺自媚好。團團理絲蟲。養身恃其巧。無能老蝙蝠。乘夜出堂奧。那能捕飛蚊。未解聒耳鬧。悲歌草閒蚓。辛苦自鳴噪。爾生可以默。何所欲而躁。鳴蛙訴其渴。謂若天可禱。瘖蟬死不鳴。豈以訴無效。悠悠羣動情。誰得辨醜好。我歌豈徒然。亦用自警告。

和周楚望

宿雨生曉潤。繁雲滋暑陰。我居廢不葺。常苦積雨侵。果墜厭風惡。草沉知潦深。拳拳抱幽歎。耿耿嬰煩襟。吾子久不來。幽居誰見臨。飄然得秀句。生我江湖心。一官亦漫爾。勤苦安能任。何當舍此去。拂我塵埃琴。飢寒仰五斗。求尺而忘尋。悲我復契闊。誰復知吾音。

秋日晨興寄楚望

夜雨霽清曉。浮雲散涼川。幽人理青髮。汲彼石井泉。焚香展素帙。持珠諷妙言。晨暉淡悠揚。秋霞麗紺天。菱花開露餘。孤葉零風前。感此芳節晚。長嘯心悠然。傾觴散滯念。餐菊留華年。牢落歲暮心。非君誰與宣。

感秋呈宏父兼呈周楚望三首

西風吹我舟。繫纜岸邊柳。蕭蕭落船葉。日夕煩我帚。心驚芳歲晚。日月去如走。搔我鬢邊髮。少壯寧復久。平生拙謀身。辛苦爲五斗。苟逃飢寒憂。不敢擇所受。心因摧折低。面苦塵埃垢。蹉蹉警前勇。俛俛蹈新操。

功名委之命。寧足計薄厚。獨攜古人書。千古相獻侑。我烹亦有魚。我酌亦有酒。非求與俗違。聊以安吾守。  
西風中夜來。飛雨隨以至。攬衣不能眠。起坐爲涕泗。炎蒸雖云酷。香草猶可佩。清商來無情。凋我蘭與蕙。  
嗚呼草蟲悲。鼻鼻露蟬嘒。高梁燕如客。鍛翮鷹方驚。乾坤本無心。萬物隨一氣。如何於其間。感愴坐自累。  
置之勿復道。得酒但知醉。陶然杯杓閒。蕭洒無餘事。

浮雲無停陰。急雨來清秋。颯颯水上風。吹我千里舟。二年客淮楚。乞米充飢喉。空堂堆詩書。冷落妻子羞。  
操舟將何之。漫浪爲西遊。豈不厭奔走。貧賤無良謀。人生天地閒。如萍水上浮。安得無所住。南北但隨流。  
達者知其然。委已任去留。止若寄渚雁。行如浮海桴。萬物本無事。百年漫多憂。冥懷付造物。俯仰予何求。

和登城依子由韻

步登高城望。望望殊未已。惟時歲將窮。冬孟月魄死。紛吾方有懷。一坐爲三起。悲歌擊枯枿。聲與淚俱至。  
人生隨大鈞。命不貸君子。付之無如何。外垢資內洗。前知賤終吉。外頗與愚似。開門張瓊瑤。誰者目不寄。  
支離冒多福。嬋娟畏獨美。舉頭蒼天高。歎此青雲士。酌公芳尊酒。願公百憂止。履善神所勞。委置目前事。

西華道中

我行陳許郊。千里平若掌。居民雜荆榛。耕少地多曠。野兔乍跳奔。驚鳶或高颺。喬林多疾風。寒澗有餘漲。  
棘籬蔽茅屋。雞犬入村巷。主人掃土場。秣馬具朝餉。童兒汲土井。敗飯堆瓦盎。勿悲爲生陋。自足無他望。  
嗟予走薄宦。奔走年將壯。長抱羈旅愁。何時稅歸鞅。

泊南京登岸有作呈子由子中子敏逸民

客行歲云暮。孤舟衝北風。出門何蕭條。驚沙吹走蓬。北涉滌河水。南望宋王臺。落葉舞我前。鳴鳥一何哀。重城何諠譟。車馬溢四郭。朱門列大第。高薨麗飛閣。湯湯長河水。赴海無還期。蒼蒼柏與松。岡原常不移。覽物若有歎。誰者知我心。口吟新詩章。手撫白玉琴。鳴琴感我情。一奏涕淚零。子期久已死。何人爲我聽。推琴置之去。酌我黃金罍。幽憂損華姿。流景良易頽。

宿合溜驛

空庭野雀噪。客至休我駒。盡日衝塵沙。解裘振裳裾。熒熒青燈光。夜永寒堂虛。破窗見星斗。明月照廣除。篝火旋烹煎。妻兒具盤盂。強飯一爲飽。困眠矇微舒。嗟我山野姿。懶拙與世疏。如何強所難。妄躡仕進途。已習未易舍。欲行倦馳驅。悲哉不早計。旣晚空嗟吁。

至日離許州

先王重至日。靜息資微陽。閉關絕商旅。后爲不省方。我獨何爲者。古寺嚴晨裝。酌酒飲僮僕。披裘冒朝霜。眷彼道路人。熙然樂而康。尊酒迭爲壽。華衣冒鮮粧。懷居固非士。遠客亦何傷。悠哉任行止。且復傾吾觴。

沈丘道中

霜霧沈遠星。芳林語春鳥。客眸帶餘睡。馬力健清曉。凝烟披草際。初日動林表。心隨和風快。興與飛雲杳。芬菲悵已晚。夏陰生桑棗。慷慨一據鞍。此懷殊未了。



感事二首

投老益無趣。誤爲世塵嬰。飄然欲脫去。疲弱安能耕。始謀苦不減。妄欲事功名。中路兩不可。徬徨始嗟驚。回轍愴已晚。悠悠事遠征。萬物各有求。我生安得寧。

自古衣食勤。物生無時閒。春耕望時雨。厚生常苦乾。舉頭呼天公。天遠安得聞。幸此中夜雨。蕭蕭洒中田。天人兩異情。相值良獨難。水旱與豐年。由來皆偶然。愚夫苦多怨。智士卽而安。我歌寧獨此。萬事一嗟歎。

漫浪翁

劉壯與年過壯。久不仕。嗜學著書。自名漫浪翁。所居之園林堂室。皆以是名之。求予爲詩。因記之。

堂有書萬卷。園有竹千竿。逍遙於其閒。漫浪追昔賢。乃祖首陽人。疾世餓空山。堂堂祕書公。赤手犯鯨鱷。後來得吾子。門戶真有傳。已信懷道貴。預知行世艱。婆婆欲頭白。不肯彈其冠。我頃未見之。千里知肺肝。不惜委珠玉。投我書數編。我窮安放逐。老去頗知田。君獨胡取之。學問攷淵源。江鄉歲已晏。幽獨抱悵悵。何當一杯酒。與子相周旋。

發岐亭宿故鎮三首

我別竟陵時。楚稻如碧絲。秋風發齊安。稻穗如植旗。流年去荏苒。客路何逶迤。弛擔終未卜。永負中山期。乘月入秋山。月午山蹊靜。森森松竹林。夾道散疏影。陰風留暗壑。白露蒙朝嶺。耿耿村雞鳴。坐感單衣冷。

征人不敢安。蓐食待明發。潤衝石上雲。冷踏松間月。艱難付一笑。歲月驚屢閱。偃亞道傍松。茯苓應可掘。

獨遊東園

清曉步東園。獨遊悵無侶。菰蒲綠已深。鵝戲春塘雨。取酒就花傾。隔林邀客語。歸來春興闌。睡起日停午。

同毅夫賀無斃教授

吾聞冤句民。盜若春竹筍。異時用武吏。搏擊縱鷹隼。洋洋劉太守。實父治曹。不用刑而盜衰。豈弟發素蘊。凶年盜乃滅。見謂君子敏。先生衍詩書。循吏副憂軫。庶幾從風靡。少緩束溼緊。君家龐眉伯。學行我標準。捧書見華髮。應爲一笑聽。

喜晴有感呈晁郎

山城淫雨霽。牕戶含餘清。老人午睡足。杖策遶荒庭。長夏吾廬秀。清陰交衆榮。茫茫樓莽中。萱草揚其英。植杖視天壤。悠然感浮生。淹泊且無嘆。人事亦難恒。一旦舍此去。觸物不無情。何爲久戚戚。遇酒但知傾。

春雪二首

春雲驕不行。東雨作飛雪。夜深歸無燭。已覺馬蹄滑。那知事未已。通夕注不歇。堂寒曉附火。簷滴更清絕。前者城東遊。桃李粲已發。陰陽不可料。寒氣晚猶洩。青青高坡麥。舊事日可閱。當春望時雨。盛雪或爲孽。生民常苦勤。不敢愛膏血。如何待一飽。常苦神物奪。茫茫元精理。未易論本末。解裘換斗酒。莫畏衣百結。天寒城南寺。門外無馬迹。東風雪疾消。春泥深一尺。豈無老款段。畏蹶不敢策。還歸見兒女。怕冷不下席。

揚雄元未就。雙鬢颯已白。雖云客載酒。此意終岑寂。功成則有命。生事亦人力。胡爲不自勤。守此欲何獲。田桑既有裕。醪醕亦餘溢。嗟哉好事客。從古百無一。

